

MPO NA NINI NATELEMELAKA

LOSAMBO YA EBONGISELI



Matondi, Ndeko Neville.

Bokoki kofanda. Ya liboso, nazalaki mpenza na misala mingi lelo kino nazangaki kozua kobengama na nzela ya nsinga ya babeli mosusu. Ezalaki na bato mosusu oyo nasengelaki kokutana na bango pe kobondela mpo na makambo na bango moko mpenza. Kasi sikawa bamosusu...moko na bisika, nakanisi ete Billy alobaki, ezali na Canada, na bisika mibale to misato. Sikawa, bayaka awa, boyebi, pe bafandaka ntango nyonso na ba-hotel pe ba-motel, ntango nyonso wana. Pe nakendeke kokutana na bango, kokutana na bango pe kobondela mpo na baoyo bautaka na bisika ndenge na ndenge na mokili mobimba, na Asia, na Europa pe bisika nyonso. Mokolo na mokolo, ntango tozalaka awa, bato bayaka se koya. Ezali na bato koleka nkama motoba oyo bazali na molongo kozela, kolikia mpo...na masolo ya makambo na bango, na bongo, ekomisaka yango lisusu mwa matata. Kasi baoyo bazalaka mpenza kobela pe baoyo bazalaka na bokono oyo esengeli kobondela noki-noki mpo na bango, ee, nalukaka kokutana na bango.

² Bongo, ee, nazalaki kuna elongo na bayangeli misolo, na mwa liyangani, na likita na ngai ya bayangeli misolo awa na losambo, tosengelaki kokutana eleki mwa ntango. Ntango nyonso wana, nalekisaki pene na ngonga moko na ndambo, pe na ntango yango esengelaki kobondela mpo na bato mosusu awa. Soki bazali awa, nalingi kobondela mpo na bango sikawa. Na bongo, soki balingi, bato oyo nasengelaki kobondela mpo na bango, ee, soki bakoki koya awa sikawa, wana mobeti piano, to moto mosusu, akoki koya ko—kotindela biso loyembo “Monganga monene abelemi sikawa, moto na mawa Yesu.” Sikawa baoyo basengeli na libondeli, soki balingi, nayebi te soki bazalaki boni. Bandeko yango ezali nde bino, nabanzi. Bandeko, ngai moko namona mpasi mingi na nzoto na ngai. Yesu amemaki ba-mpasi na nzoto na Ye, mpo Akoka kozala lolenge malamumu ya Molobeli, mpo Ye azalaki Nzambe kati na nzoto mpo Akoka koyoka mpasi. Akokaki koyoka mpasi ya bolembu. Yango wana Ayaki kolimbisa masumu. Pe yango wana, Atindaki Lingomba na Ye kokoba kosala mosala na Ye.

³ Pe na—napesaka limemia mingi na mosala ya minganga, ya kopasola pe bongo na bongo, bato—bato oyo Nzambe apesi bango mayele ya kosalisa nzoto na makambo ndenge na ndenge, kopasola, kolongola muno oyo ebebi, pe bongo na bongo.

Nasepelaka na yango mingi. Kasi na ntango moko, mayele na—na bango ekómaka na suka, ba—bayebaka eloko ya kosala te. Bomoni? Nakanisi ete, na ntango wana, tozalaka na makoki ebongi be mpenza, lokola na mokili, soki tokei na monganga na biso ya libota, ntango mosusu mo—monganga yango azalaka na mboka, mobange monganga moko malamumu, oyo azuaka mwinda, kotambola na zamba na butu, mpo na kokutana na yo, kosalisa yo. Pe soki boyebi na ye esuki, akokende na moto oyo ayebi mwa mingi koleka ye. Akotinda yo epai ya specialiste moko. Bongo, soki boyebi ya specialiste esuki, na—nazali na esengo mpo tozali na liziba mosusu, Monganga monene.

⁴ Pe Akweyaka te, Oyo wana akweyaka te, mpo Ye moko Azali Mokeli. Pe Asilá kofungolela biso nzela. Sikawa, soki ezalaki na nguya moko ya kobikisa babeli kati na ngai, mpo na kosala yango, na—nakoya wana mpo na kosala yango. Na—nakosepela kosala yango. Kasi, nguya ya kobikisa babeli, nazali na yango te, moto mosusu moko te azali na nguya ya kobikisa babeli. Kasi totindami, bomoni, kobondela mpo na babeli, na Klisto, Ye oyo asilá kotia na ebombelo nguya ya kobikisa babeli. Bomoni? Pe biso tozali bobele koya, ndenge ezalaka, kokoma yango na chèque. “Nyonso bokosenga na Tata na Nkombo na Ngai,” ezali chèque bakomá eloko te, “nyonso bokosenga na Tata na Nkombo na Ngai, Nakosala yango.” Oyo nde elaka! Ekoki kokweya te. Pe nasungaka bandeko na ngai mibali pe basi, na mokili mobimba, mpo na kotia bibombelo oyo. . . to kozua mbano oyo ekomami na Banque ya Nzambe, na Makila na Yesu Klisto. Pe ezalaka ntango nyonso na elonga. Afutaka ntango nyonso, mpo ebombelo esilá kotiamama kuna, bomoni. “A—A—*Asilá* kozokisama mpo na mabe na biso, na mapipi na Ye *tosilá* kobikisama.” Bomoni, makambo nyonso esilá nye. Pe na mpokwa oyo, tosepeli na kondima na bino.

⁵ Nakanisi ete Billy ayebisaki ngai likambo ya ndeko oyo asali mobembo molai kolongwa Canada to esika moko boye. Ezali solo? Ezali yo ndeko oyo auti Canada? Bongo—bongo outi wapi, ndeko? [Ndeko mobali yango alobi: “Bobele na nordi ya Fort Wayne, na Kendallville.”—N.D.E.] Kendallville, Indiana, auti na Fort Wayne. Libala na ngai esalemaki na Fort Wayne. Nayebi yango malamumu. Nasalaki mayanganani mingi kuna, na Mongombo Rediger. Nabanzi oyebi esika ezunami. Nabosani te, ntango nazalaki elenge, nayekolaki na makolo ya Paul Rader, na Mongombo Rediger, lokola elenge motei moyekoli. Azalaki moto monene, Ndeko Paul, Ndeko Rediger pe lokola, bazalaki bato na kondima. Milimo na bango ezali kopema na mpokwa oyo. Pe sikawa, lokola nazalaki elenge, nazali komeka kokoba mosala bango batikaki, mosala Yesu atikelaki Lingomba na Ye kobanda ntango wana.

⁶ Sikawa, ná kondima nyonso nazali na yango, nayei kobondela mpo na bino. Pe na—naye te kaka boye. Tolingaka ata

moke te kobeleva na yango lolenge wana. Te, ezali malamamu te. Tozali koya na kondima ete tokozua eloko oyo tosenzi, bomoni, koyeba ete Nzambe alakaki yango. Pe tozali koya na elikia na motema, ete Klisto apesaki elaka, pe bino, bandeko, bosili kotia kondima na bino likolo na etumbelo, bosili kosala nyonso bokoki kosala, naye kotia oyo ya ngai elongo na bino na mpokwa oyo. Bomoni?

⁷ Pe sikawa, tozali na etumbelo monene oyo etandami na ngámbo mosusu ya likolo, pe likolo na yango etiami Mbeka na biso, Mwana na Nzambe. Bomoni? Ezali Mbeka oyo ezali kotangisa makila. Nzambe akoki kotala mosika na yango te kozanga komemia Yango, bomoni, Mpo Ezali Liloba na Ye: “Oyo azali Mwana na Ngai ya bolingo, bóyoka Ye.”

⁸ Nakosenga na Ndeko Neville, mpaka na biso, soki akoki koya sikawa elongo na ngai, wana tozali kokende. Nalingi ete losambo mobimba . . . Bongo soki ezalaki likambo ya ndeko na yo, mobali na yo, mwana na yo, tata na yo? Ezali moto ya moto moko, bóbosana te. Tika ete, na bosembo nyonso tozali na yango, tóbelema liboso na Nzambe sikawa, mpo na bandeko oyo.

Tógúmba mitó na biso.

⁹ Tata ya ngolu na Likolo, tomemi Liboso na Yo sikawa, pene na etumbelo ya ngolu, ata totetelemi pene na mwa ebóngá ya libaya, ndenge ezaláká, awa na mokili, kasi kondima na biso emati kino na etumbelo monene ya kotumbwa, kuna esika Yesu (Malasi ya nsolo kitoko liboso na Nzambe, Mbeka ya Makila ya Kalvari) Oyo alongaki bokono nyonso, maládi nyonso, kufa, ewélo, pe nkunda, Asekwaki pe Amataki na Likolo, mpo na kofanda na loboko ya mobali ya Bonene na Ye. Pe biso, na kondima, toyei komimatisa kuna, na ngolu ya Nzambe, mpo na koloba liboso na etumbelo oyo, na Mokeli monene ya Likolo ná nse ete: “Yamba biso, Nkolo, wana toyei na Nkombo na Nkolo Yesu.”

¹⁰ Tala bandeko na biso, pe moko na bango auti kuna, likolo ya Fort Wayne, awa na Ekólo, pe mosusu auti mosika mpenza, kolongwa Canada kino awa, bayei mpo na ntango ya motuya koleka oyo. Ezali likambo ya kufa to bomoi, Nkolo. Tala bato mibale oyo, bazali naino bilenge, bazali naino na mosala ya kosalela Yo, Nkolo, ba-sodá mibale, Baklisto oyo bandimeli Yo. Moyini asili kobeta bango mbanzi, pe mbanzi ya nenge yango esili kokota esika moko na nzoto na bango, pe bazongi, bazongi sima, na lopitalo ya ngolu ya Nzambe, mpo na kozonga na boyokani, mpo na lobiko na nzoto, mpo bákoka kozonga lisusu na bitumba, na kotombola nguba, ekokende bango na etumba. Bayei kosangana na mampinga ya mabondeli elongo na biso, Nkolo. Pe tokei kokutana na moyini.

¹¹ Na Nkombo na Yesu Klisto, tíká bango. Tolobi na yo na Nkombo na Yesu Klisto, tíká bango nsomi.

¹² Bazali babundi na etumba. Pe, lokola mosali na Yo, nakei sikawa kotiela bango maboko, na kondima, kondima ete: “Bilembo oyo ekobila baoyo bakondima,” elobaki Nkolo na biso, Kapiténé Mokonzi na biso monene, “bakotia maboko na babeli, pe bakobika.”

¹³ Nazali kosala yango na Nkombo na Yesu Klisto. Tika ete nguya ya bokono, oyo ekangi nzoto ya ndeko mobali oyo, étika ye, na Nkombo na Yesu Klisto.

Nguya ya bokono oyo ekangi nzoto ya ndeko mobali oyo, tíká ye. Na Nkombo na Yesu Klisto, ékende.

¹⁴ Nzambe na Nguya nyonso, Mokeli ya Likolo ná nse, Mobandisi ya Bomoi na Seko, pe Mopesi ya makabo malamumu nyonso, kitísá mapamboli na Yo likolo na bato oyo touti kopambola. Pe ekomami na Makomi, ete: “Soki olobi na ngomba oyo: ‘Longwa wana,’ otii ntembe na motema na yo te, kasi ondimi ete likambo olobaki ekosalema, okoki kozua likambo oyo olobaki.” Nandimi ete bokono na bango esili kolongwa na ba-nzoto na bango. Sikawa esilaki kolobama; tika ete ésalema sikawa. Amen.

¹⁵ Na Nkombo na Nkolo Yesu nandimi ete okangolami. Na Nkombo na Yesu Klisto nandimi ete okangolami. Amen.

Losambo endimi pe bongo? [Losambo balobi: “Amen.”—N.D.E.] Na bongo, tika ete ésalema.

¹⁶ Sikawa, ezali na bato mosusu awa, oyo balingi ete tókanisa bango na libondeli, bótómbola maboko? Malamumu, tóbelema liboso na Ye sikawa, wana botiani maboko moko na mosusu kuna. “Bilembo oyo ekobila baoyo bakondima.”

¹⁷ Nzambe oyo aleki bulee, na kondima tozali komona Yesu, tondimi ete Azali awa. Abatelaka Liloba na Ye. Pe Alobaki: “Esika bato mibale to misato basangani na Nkombo na Ngai, Nazali elongo na bango.” Sikawa, Tata na Likolo, tika ete nguya ya Nzambe na Nguya nyonso émama bato oyo, Nkolo, wana basangisi maboko na bango elongo, batiani maboko moko likolo na mosusu. Etinda ya suka Opesaki na Lingomba: “Bilembo oyo ekobila baoyo bakondima. Bakotia maboko na babeli, pe bako. . . bakobika.” Yo olakaki yango, pe biso tondimi yango. Na bongo esili kosalema sikawa, pe tokumisi Yo mpo na yango, na Nkombo na Yesu Klisto. Amen.

¹⁸ Pe na Nkombo na Yesu Klisto, tika ete nguya na Nzambe épakola bilamba mpo na babeli pe bato na bosenga. Ntango ekotindama pe ekotiana likolo na babeli, tika ete ésalema, ete bábikisama. Totangaki na Biblia ete bazuaki ba-mouchoirs, bilamba longwa na nzoto ya Santu Polo; milimo mabe ezalaki kobima na bato, pe bokono ezalaki kobikisama. Pe, Tata, toyebi ete tozali Santu Polo te, kasi toyebi ete Ozali Yesu kino lelo. Pe tosenge ete Ókokisa bosenga oyo mpo na nkembo na Yo. Amen.

¹⁹ Nayebi te soki ezali . . . babandi kotia yango na bände, to te. Babandi? Soki te, nalingi báfungola yango sikawa. Nabanzi ete bafiní naino bouton te. Sikawa, nakanisi ete nakolembisa bino na mpokwa oyo te. Nabandi pene na ndambo ya ngonga to miníti ntuku misato na mitano liboso na ntango. Na bongo, ezali liteya ya eteyelo ya lomingo, pe nakanisaki ete ntango mosusu ekozala malamú, soki likambo oyo ezali na motema na ngai etiami na bande. Pe etikali moke tókota na e—eteni ya sika, mongombo ya sika, nyonso ya sika.

²⁰ Pe sikawa, nalingi kotánga mwa Makomi. Soki bino pe bolingi kotánga elongo na ngai, nalingi kotánga na Samwele ya Liboso, mokapo ya 8, tolingi kobanda na molongo ya 4 kino ya 10; na sima, mpo na kowela ngonga, molongo ya 19 kino 20. Nazali na nkasa mingi ya Makomi pe makambo tokolobela awa, na lolenge ete soki bino bozali na ekomeli pe crayon, to eloko mosusu, lokasa, soki bolingi kosalela yango to kokoma yango, bókoki kozua yango, to, M. Maguire akozala na—na—na bande yango.

²¹ Pe nalingi ete bande oyo épesama mpenza na batei, bandeko na ngai, batei oyo basósólaka ngai mabe, koleka mingi bandeko ya mangomba ya bibongiseli. Pe mingi na yango nyonso ezali bibongiseli.

²² Motó ya liteya na ngai na mpokwa oyo ezali: *Mpo Na Nini Natelemelaka Losambo Ya Ebongiseli*. Sikawa nakotánga, lokola moboko, to litánga ya Makomi, mpo na kotélemisa yango mpenza na Makomi, nalingi kotánga Samwele ya Liboso 8:4-10, na sima 19-20. Mpo na bino bayóki bozali awa, natii motema ete ntango bokozonga na ba-ndako, Makomi oyo bokomáki, bokotánga yango na bokebi. Mpo na bandeko oyo bakoyoka bande, natii motema ete bino pe bokokanga bände te soki likambo moko elobami, oyo ntango mosusu bondimaka te, kasi bokoluka Nzambe kati na yango, mpo na koyeba soki ezali na Makomi. Nakanisi ete tosengeli kosala bongo mpo na biso moko pe mpo na Nsango ya lelo.

²³ Nandimaka ete mangomba nyonso ezalaka na Baklisto kati na yango, pe na bosolo, nalobaka mpo na kotelemela Baklisto te. Kasi ntina nasalaka makambo nasalaka, pe nalobaka makambo nalobaka, ezali mpo na mpemela ya Molimo Mosantu likolo na Liloba.

²⁴ Sikawa tótánga liboso Samwele ya Liboso, mokapo ya 8, kobanda na molongo ya 4, pe tokotánga kino na 10, liboso.

Na sima, ba-mpaka nyonso ya Yisalaele bayanganaki pe bayaki epai na Samwele na Rama,

Pe balobaki na ye ete, Tala, yo okómi mobange, kasi bana na yo batamboli te. . . batamboli na nzela na yo te: sikawa, ponéla biso mokonzi mpo ásambisaka biso lokola bikólo nyonso.

Kasi likambo yango esepelisaki Samuele te, ndenge balobaki ete, Pesa biso mokonzi ete ásambisaka biso. Pe Samwele abondelaki Yawe.

Bongo Yawe alobaki na Samuele ete, Yoka mongongo ya bato na makambo nyonso oyo bazali koloba na yo: mpamba te baboyi yo te, kasi baboyi nde ngai názala mokonzi na bango.

Kokokana na makambo nyonso oyo basalaki banda mokolo nabimisaki bango na Ezipito kino na mokolo ya lelo, ndenge bazalaki kotika ngai, pe kosalela banzambe mosusu, bazali kosala yo pe ndenge wana.

Sikawa, yoka mongongo na bango: nde kebisa bango makasi, pe talisa bango lolenge ya mokonzi oyo akokonza bango.

Bongo Samuele ayebisaki bato oyo bazalaki kosenga ye mokonzi maloba nyonso oyo ya Yawe.

25 Sikawa molongo ya 19 pe 20 mpo na kosukisa.

Ata bongo, bato baboyaki koyoka mongongo ya Samuele pe balobaki ete, Te, mokonzi nde áyangela biso;

Biso pe tosengeli kokóma lokola bikólo nyonso, pe mokonzi na biso ásambisaka biso, pe ábimaka . . . liboso na biso mpo na kobunda bitumba na biso.

26 Tika ete Nkolo ábakisa mapamboli na Ye likolo na botángi ya Maloba na Ye. Sikawa, lokola kelasi ya eteyelo ya lomingo, nalingi koloba ete tolingi komeka koyoka Liloba na—na bokebi nyonso mpenza.

27 Pe toyebi ete—ete ntango mosusu makambo elobamaka, (pe mangomba mosusu), oyo ebetisaka libaku moto oyo alakísámá kokesene na oyo basílá . . . bazali koyoka. Ndakisa, mokolo mosusu, moto moko ayebisaki ngai, moto yango azali moninga na ngai pe azali awa sikawa, alobaki: “Ntango olobaki, Ndeko Branham, ná kondima nyonso nazalaki na yango epai na yo, ndenge nazalaki kondimela yo, ntango olobaki ete ‘lifelo ya Seko’ ezalaka te,” alobaki, “nalingaki kokweya esika nafandaki. Pe nalobaki: ‘Na ntembe te, moto oyo azali na libunga.’” Na sima, alobaki: “Otelemisaki biso ntango moke. Na sima, olobaki: ‘Lolenge ya Bomo na Seko ezali bobele moko, pe eutaka na Nzambe.’” Pe yango nde biso nyonso tolukaka, bomoni.

28 Pe Likomi moko te elobi ete lifelo ya Seko ezalaka. Mpo, Seko ezalaka na ebandeli ata moke te, ekozala pe na suka te. Na bongo, Biblia elobi ete “lifelo ekelámáki mpo na zabolo ná banje na ye,” na bongo, ezali Seko te. Na ntango moko ezaláká te, pe na ntango moko lisusu ekozala te. Kasi bakoki kozua etúmbu kuna, na móto, na sufúlu ná libeke na móto, mpo na ntango molai mpenza, kasi sukasuka ekosuka, mpo lifelo ezali Seko te. Pe soki lifelo ya Seko ezali, osengeli kozala na Bomo na Seko mpo na kobika na

lifelo ya Seko. Pe soki ezalaki Seko, ezalaki ntango nyonso, pe yo ozalaka ntango nyonso na lifelo pe okozala ntango nyonso na lifelo. Bomoni, na bongo, eloko ya lolenge wana ezalaka te.

²⁹ Na bongo, bomoni, *Seko* elingi koloba “ezalaki ata moke te na ebandeli to na suka”. Lolenge ya Bomoi na Seko ezali bobele moko, ezali kati na Nzambe, euti na lokóta ya Greki na liloba oyo *Zoe*, elingi koloba “Bomoi Mpenza ya Nzambe”. Pe ntango tobótami mbala ya mibale na Molimo ya Nzambe, tokómi Seko elongo na Nzambe, mpo tozui eteni ya Bomoi na Ye, oyo ekómisi biso bana na Nzambe ya mibali pe ya basi, na ntango wana nde tozali na Bomoi na Seko. Pe Bomoi oyo ezali kati na biso, Nzambe akosekwise nzoto oyo ezali na Bomoi mokolo ya suka, kasi ezali Molimo ya Nzambe oyo ezali kati na biso nde ekosekwa, mpo Molimo ya Klisto, oyo ezalaki kati na Klisto, nde ekopesa bomoi na ba-nzóto na biso pe ekosekwise biso pe, elongo na Ye, mpo na kofanda na—na—na nkembo pe kokonza elongo na Ye.

³⁰ Sikawa tózonga na liteya, sikawa, nasili koleka na mibu nyonso oyo, pe mongombo oyo etelemi ngwi. Ata nabúlisamaki na bonganga na lingomba Baptiste Missionnaire, na Docteur Roy E. Davis, eleki pene na mibu ntuku misato na misato, awa na Jeffersonville. Sikawa ngai, kobanda wana, nazalaki kati na ebongiseli ntango moke, ba-sanza moke, liboso lingomba yango é sala likambo moko, oyo ezalaki libanda na Makomi, pe naye bisaki ye ete nakokaki kondima yango te. Na bongo, aye bisaki ngai ete nasengelaki mpenza “kosála yango to eloko mosusu”, pe naponaki eloko mosusu. Bongo, ezalaki likambo moko nandimaka, ete oyo ezali Liloba na Nzambe. Pe nalobaki na moto oyo azalaki mo—molakisi ya balakisi: “Soki okoki kotalisa ngai yango na Liloba na Nzambe!”

“Kasi ezalaki,” elobaki ye, “ezali malakisi na biso.”

Nalobaki: “Kasi ngai nalingi éuta na Liloba, omoni, Liloba na Nzambe.”

³¹ Pe ezali te mpo nazalaka na ebongiseli moko te nde natelemelaka ebongiseli, mpo nazongisaka matondi mingi na bandeko na ngai, baoyo nazali kolobela lelo, mpo nazali na bambéla, nabanzi, mpo na kokende na, pene na bibongiseli nyonso, koleka mingi kati na bato ya Litóndi ya Nsango-malamu, ata pe kati na mangomba mosusu mingi. Basilá kosenga ngai kokóta na bondeko na bango pe kosangana na bango, kasi natikálá na ngai nsomi. Mpamba te, lokúmu oyo nazali na yango, nalingi kotia yango likolo na etóngá moko ya bato te. Nalingi kotia likambo oyo Nzambe apési ngai, kobondela mpo na babeli, kozala lisungi mpo na bana na Nzambe nyonso kati na bibongiseli nyonso. Apekisaka ngai te kobondela, mpo na moto songolo mpo azali mondimi ya lingomba *boye na boye*, Nzambe atalaka motema ya moto.

³² Sikawa, likambo ya liboso, ntina oyo nazalaka kati na yango te pe natelemelaka yango, ezali, ya liboso, ezali mpo nandimaka te ete ebongiseli ya Boklisto ezali kati na Makomi. Nandimaka ete ezali libanda na Makomi. Pe yango nde nakomeka, na mpokwa oyo, kosala makasi na ngolu na Nzambe, mpo na kotalisa bino polele ete ezali libanda na Makomi, kozala na ebongiseli ezali mpenza libanda na molongo.

³³ Sikawa, ya liboso, tobengaka yango “losambo”, liloba oyo *losambo* ezali “ezipelo”, ezali mpo na kozipa eloko moko. Sikawa, Adama azalaki na losambo, kasi, na bosolo, amisalelaki yango ye moko, na nkasa ya mosuke, kasi esimbaki te. Amisalelaki mayele na ye moko pe amekaki komisalela nzela ya kokímela, mpo na kozua lobiko na eloko oyo ye moko amisalelaki, kasi Nzambe aboyaki yango, kobanda Adama kino na molongo ya ebongiseli ya suka. Ezáláká ata moke te, pe na ngolu na Nzambe, tokotalisa yango polele lelo na Biblia. Losambo ezalaki ezipelo. Adama amisalelaki ezipelo longwa na nkasa ya mosuke, amisalelaki yango ye moko, mpo na komeka kosala eloko moko ye moko.

³⁴ Kasi Nzambe azalaki kosenga kufa, bolimbisi masumu. Sikawa, bokeseni ezali monene mpenza kati na losambo ná lobiko, bomoni, lobiko. Losambo ezali ezipelo. Bomoni? Lobiko ezali Mbotama, likabo na Nzambe. Lobiko ezali Mbotama, likabo na Nzambe, pe ekoki kokokisama na moto moko to na etóngá moko ya bato te. Ezali likambo ya moto oyo Nzambe amemeli likabo oyo. Pe makabo oyo ya Bomoï na Seko ebongísámá na Nzambe mpo na moto moko na moko liboso mokili ézalisama, kokokana na Makomi. Biblia elobi, na Emoniseli, ete motemeli-na-Klisto oyo asengelaki koya na mokili, apengwisaki baoyo nyonso bafandaki na mokili, baoyo ba-nkómbo na bango ekomamaki te na Buku na Bomoï ya Mwana-Mpate liboso na kozalisama ya mokili. Bomoni? Nzambe, na boyebi na Ye liboso, amonaki nani akoya pe nani akoya te, Klisto ayaki mpo na kofungola nzela mpo na baoyo bakoya. Bomoni, koyeba bamosusu.

³⁵ Soki Azali mpenza Nzambe, Asengeli kozala na suka te. Pe soki Azali na suka te, Akoki te kozala na suka te pe kozanga kozala na nguya-nyonso. Akoki te kozala na nguya nyonso pe kozanga kozala bisika nyonso. Akoki te kozala bisika nyonso pe kozanga koyeba makambo nyonso. Na bongo, bomoni, nyonso wana esali ete Azali Nzambe.

³⁶ Na bongo, Ayebaki suka longwa ebandeli. Ayebaki nani akoya pe nani akoya te, pe Ayebaki ete mingi bakoya, na bongo, Atindaki Klisto mpo na kolimbisama ya masumu ya baoyo bakoya. Sikawa, eloko moko te oyo tosalaka ekoki kosala eloko moko na likambo yango. Yesu alobaki: “Baoyo nyonso Tata asilá kopesa Ngai,” asilá, ntango eleká, “bakoya epai na Ngai. Pe moto

moko te akoki koya soki Tata na Ngai abendi ye te.” Bomoni? Sikawa, nyonso wana ezali kati na boyebi na Nzambe.

³⁷ Okoloba: “Ndeko Branham, ngai nazali na kati?” Nayebi te. Nazali kolikia ete nazali na kati. Tosalaka mpo na lobiko na biso moko na kobanga pe kolenga. Sikawa, Lingomba ebongisámá liboso mpo na kokútana na Nzambe kozanga litóno to nzoloko. Sikawa, soki tozali kati na Lingomba yango, tobongísámá liboso elongo na Lingomba yango. Sikawa, bómitala bino moko na nzela na Liloba, na bongo, bokoki koyeba ndenge tokómi mosika na nzela.

³⁸ Sikawa, sikawa, Boklisto ya ebongiseli ekoki kopesa elikia wana ata moke te. Te. Bamosusu kati na bango balobaki: “Yaka na etumbelo, tátola ete Yesu azali Klisto pe zua libatisi na lingomba.” Zabola pe asalaka likambo yango moko. Andimaka mpenza ete Yesu azali Klisto, pe aléngaka. Bomoni, ya solo.

³⁹ Nzambe atindá naino te, esika moko te kati na Makomi, ete ebongiseli moko ésalema. Esika ata moko te ezali na Biblia mpo na yango. Adama abandaki moko kasi esimbaki te.

⁴⁰ Na sima, Nimerode amekaki kosala ebongiseli. Soki ozali moyekoli ya masolo-ya-kala, pe oyebe masolo-ya-kala ya Babilone, tángá *Ba-Babilone Mibale* oyo ekomáma na Hislop, okososola malamau mpenza. Ete, Nimerode, mosumuki oyo, azuaki Babilone ná mangomba mike-mike na yango nyonso, to bisika oyo ezalaki nzinga-nzinga na yango, ezalaki elilingi ya—ya Boklisto ya batomboki ya ntango oyo ya suka, pe asalaki esika moko ya monene pe bamosusu nyonso bazalaki kofúla . . . kofúta mpako kuna. Atongaki ndako molai kuna pe alukaki kosangisa bato na ebongiseli, kasi esimbaki te. Esimbaki te. Yango esimbaki te.

⁴¹ Kora, na Mituya 16:1, soki bokolinga kotánga yango, Kora pe alukaki kosala mpenza likambo yango moko. Asangisaki Balewi nyonso, pe azuaki . . . bato ya lokumu, bato ya motuya, bato minene, basantu, pe ye ná Datana basanganaki pe balobaki: “Ezali malamau te, moto moko áluka kozala likolo na biso nyonso.” Na bongo, bamekaki kobanda elongo ebongiseli moko, bayaki liboso na Mose ná Arona, baoyo Nzambe aponaki mpo na mosala, pe balobaki na bango ete bazalaki komema bango moko mokumba monene koleka, ete bato nyonso na eyanganelo bazalaki basantu, pe bazalaki na makoki ya . . . “Lobiko ezalaka kati na ebele na bapési-toli,” ya solo mpenza, balobaki bongo. Oyo wana ezali mpo na Boklisto te. Ezali mpo na bitumba. Bótala malamau, bokeseni ezali monene mpenza.

⁴² Okoki kozua Likomi moko, pe koloba: “Yudasi akendeki komitia singa na kingo” pe “kende kosala ndenge moko,” soki olingi, kasi elingi koloba te ete ezali malamau.

⁴³ Nzambe asilaki kopona Mose pe Nzambe asilaki kopona Arona, pe ezalaki nsango ya eleko wana. Ata ngámbo mosusu

emonanaki malamu ndenge nini, ekeseneki na makanisi ya Nzambe. Tosengeli kotika makanisi ya Nzambe kozala makanisi na biso. “Tika ete makanisi oyo ezalaki kati na Klisto ézala kati na bino.” Pe Biblia oyo emonisaka makanisi ya Klisto. Pe Buku mobimba ya Emoniseli, oyo ebengami Emoniseli, ezali Emoniseli ya Yesu Klisto. Pe tokoki komona ndenge nini Akweisaka likambo yango, ndenge Atiaka yango pembeni, pe tokokóma na yango sima na ntango moke. Malamu.

⁴⁴ Kora, nakanisi ete azalaki sembo na mosala na ye. Nakanisi ete moto yango a—akánaki kosala mabe te. Nakanisi ete ezalaki kozanga koyeba ya moto yango, oyo amonaki te loboko na Nzambe kosala pe azangaki koyeba Makomi, yango wana akotisaki mabanzo na ye.

⁴⁵ Ezali yango, pene na ntuku libwa likolo na mokámá ya makambo lelo, ezali été tolukaka kokotisa makanisi na biso na mwango ya Nzambe. Tosengeli kokanisaka bongo ata moke te. Ye akanisaka mpo na biso. Tosengeli kotika makanisi na biso na mokano na Ye. Bososoli sikawa?

⁴⁶ Kora, ná mposa malamu, azalaki kotambola na malakisi ya lokuta, koyebisa bandeko yango, pe kotalisa bango na nzela ya mabanzo, ete Nzambe apambolaki bobele mosakoli, motindami Mose te, apambolaki bobele ye te, kasi: “Eyanganelo mobimba ezalaki bulee,” alobaki, “pe sikawa, eyanganelo mobimba ezali na makoki ya kosala likambo *boye*, pe eyanganelo mobimba ezali na makoki ya kosala likambo *oyo kuna*.” Na bongo, bazalaki na bato malamu, Balewi. Sikawa, ezalaki koponama ya Nzambe, lelo bakoki kobengama “batei”, Lewi azalaki motei ya tempelo. Mose abengaki bango kuna mpo na yango, boye te? Pe, awa, asalaki yango ata moke te liband-. . . kozanga limemia. Ayebisaki bango ete bázia bambeki ya kotia móto, bátia móto ya bulee kati na yango, pe mpaka-malasi likolo na yango, pe báningisa mpaka-malasi yango ya bulee, ezalaki mobeko ya Nzambe. Pe bango bayei kozua etóngá ya bato mpo na kokonza lingomba, esika Nzambe apesáki etinda ya mosala yango na moto moko.

⁴⁷ Pe, ntango basalaki bongo, Mose akweyaki na elongi na ye mpo ayebaki ete Nzambe asilaki kopesa ye etinda ya mosala wana. Pe Nzambe alobaki: “Yébisá bango ete báyá na bambeki yango awa, liboso na mongombo.” Na bongo, ntango babandaki koningisa bambeki na bango etondi na móto, pe mpaka-malasi ezalaki komata, Nzambe alobaki na Mose ná Arona: “Bókabwana na bango! Bóbima kati na bango!” Mpamba te, na sima Abengaki bango “basumuki, bazangi kondima”.

⁴⁸ Pe lisumu ezali kozanga kondima Liloba na Nzambe. Oyibaka mpo ondimaka te. Okosaka mpo ondimaka te. Osalaka ekobo mpo ondimaka te. Soki ozalaki mondimi, olingaki kosala

bongo te. Ezali bobele na ba-robe mibale, ezali kondima to kozanga kondima, okonzamaka na moko to mosusu.

⁴⁹ Sikawa, Nzambe, na ebandeli, azalaki Liloba, pe Akómaki moto pe Afandaki elongo na biso. Azalaki Liloba, Azali Liloba! Pe ntango Nzambe afandi kati na yo, ezali Liloba na Nzambe nde efandi kati na yo, na ntango wana, okondima “amen” na nyonso Akoloba. Ezali Nzambe nde afandi kati na yo.

⁵⁰ Sikawa, soki botali malamau, bato wana basalaki eloko te, basimbaki ba-mbeki na maboko na bango, bazalaki na móto ya bulee na maboko na bango, Nzambe afungolaki mabelé pe emelaki bango, pe Akabolaki bango na Mose mpo Mose akabwanaki na bango. Pe Mose akebisaki eyanganelo: “Bólanda etongá ya bato ya ndenge wana te. Bóbima kati na bango!” Sikawa, boyebi Makomi, bótánga mokapo ya 16, ya 17, ata ya 18, pe bokomona yango. “Bókabwana na basumuki oyo, basumuki oyo bazangi kondima. Bóbima kati na bango, mpo bazali kokende na kufa, ná biloko na bango nyonso.” Pe ntango bango . . . mabelé ebúkanaki pe ekweyaki ná bato oyo basimbaki móto ya bulee. Bato ya motema sembo bapéngwisami na bato.

⁵¹ Motindo moko lelo! Ezali na bato mingi ya motema sembo bazali kokweya na motámbo ya mimesano, wana basimbi Liloba ya Bulee na maboko na bango, pe bazali kokanisa ete bazali koteya Yango. Namonaki ndenge elongi ya motei moko ekómaki mbala moko, motei Metodiste, azalaki motei Metodiste kino na mpokwa ya lomingo eleki. Pe ntango atalaki, nakanisi ete ezali na motuya monene mpo na yo, ndeko, kobima.

⁵² Sikawa, bomoni, basimbaki ba-mbeki, móto ezalaki kotumba mpaka-malasi ya nsolo kitoko liboso na Nzambe, pe maboko na bango esimbaki yango, kasi ata bongo bakufaki ná ba-mbeki na maboko na bango, mpo bazalaki koluka kosala likambo moko na bosembo, kasi etelemelaki Liloba na Nzambe, koluka kosala ebongiseli. Balobaki: “Ozali komema mokumba monene koleka yo moko. Yo ozali nani mpo na koloba ete ozali na Liloba nyonso ya Nzambe?”

⁵³ Bazangaki komona ete Mose azalaki mo—motindami ya eleko wana. Bomoni, azalaki na YANGO ELOBI NKOLO. Ata moto moko te na mokili azalaki lokola ye. Azalaki na Nsango, kasi bato bazangaki komona Yango. Kasi Mose akangamaki mpenza na YANGO ELOBI NKOLO. Ya solo. Malamau.

⁵⁴ Sikawa, tozali komona likambo yango moko lelo, bato malamau, bato minene, bato ya motuya, bazali komeka koteya Liloba na Nzambe (na maboko na bango) na nzela ya mimesano ya bato. Kolongola *awa*, kokata *kuna*, kokómisa yango *boye*, pe “yaka kokota na lingomba pe kozua kálati mosusu ya mondimi,” kasi na molimo, bazali kokufa, ná Liloba yango na maboko na bango! Bomoni?

55 Bakokaki kondima te motindami ya Nzambe to Nsango na Ye ya eleko wana. Bakokaki kososola te mpo na nini Nzambe monene aboyaki kosala na etónnga mobimba ya bato, mpo na kotia yango bobele likolo na moto moko.

56 Bato boni nasololi na bango lelo: “Tokosálá nini, Ndeko Branham? Toyebi ete olobi sóló, kasi tokosálá nini? Ebongiseli ekobengana biso, tokozala na esika mosusu ya kokende te.” Nayokélaka bango mawa; kasi Esika moko ezali. Bokoloba: “Ee, tokokufa na nzala.”

57 Dawidi alobaki: “Nazaláká elenge, lelo nakómi mobange, kasi namóná naino moyengebene kosundolama te, to bana na ye kosenga lipa.”

58 Ezali mpenza na ntina yango moko nde baboyaki Yesu. Bakangamaki mingi mpenza na bibongiseli na bango, na banganzambe ya bulee, na ba-ndako ya bulee, na ba-losambo ya bulee pe na ba-tempelo ya bulee, kino bazangaki komona Nzambe kati na tempelo na Ye ya nzoto. “Yo, Ozali moto, pe Ozali komikómisa Nzambe.” Bomoni, bakangamaki mingi mpenza na yango! Bato yango bakangamaki mingi mpenza kokanisa ete Datana ná bamosusu bazalaki koloba sóló. Nimerode akangamaki mingi mpenza kokanisa ete akokaki kosala eloko moko oyo ekomema bato kokima nkanda na Nzambe. Adama amindimisaki mpenza ete soki azipaki bolumbu na ye, Nzambe akokaki komona yango te. Bokoki kozipa yango te, Nzambe nde asengeli kozipa yango. Bomoni? Bomoni? Mwangi ya Nzambe nde ezipaka yango, ya bino te. Ezalaka ntango nyonso bongo, bazangaka komona Yesu kati na tempelo na Ye, Nzambe oyo atalisami na nzoto.

59 Lelo oyo, esalaka ngai mpasi ntango namonaka ete mimesano ekati-kati Maloba ya Biblia biteni-biteni. Pe bato ya motema sembo oyo bazali kuna pe bazali koyoka Liloba yango, bayebi ete Ezali Solo, kasi bazangi mpiko ya kobima wana, mpo mimesano na bango etei bango ndenge mosusu. Bósukola bambéki ná ba-nzúngu, bongo, bandeko, bókende liboso. Kasi mpo na biso, mpo na ngai ná ndako na ngai, toponi Klisto, Liloba. Bomoni?

60 Tózua naino Yoane 3, Nikodeme, molakisi pe mokambi ya ebongiseli monene ebengami Sanhedrin. Basanganaki, pe babongisaki mimesano na bango. Oyo ya—ya Bafalisai ná oyo ya Basadukai, na eleko wana, bazalaki na bibongiseli na bango, bokeseni na bango, na bongo, bango. . . Moto yango azalaki molakisi, mokambi ya Sanhedrin monene wana, moto monene na malakisi yango. Akanisaki ete ayebaki Makomi. Ayebaki yango na nzela ya mimesano na bango. Yesu alobaki te ete: “Na mimesano na bino, Mibeko ya Nzambe ézangi nguya?”

61 Bomoni, mpo na mimesano na bango! Ezali nini? Kobakisa ndimbola na bango moko na Liloba, esika ya kotika Yango

bongo, oyo Yango elobi. Balobaka ete elingi koloba Boye te. Soki botali malamau, ezali mongongo yango moko oyo zabolo alobelaki Eva, mpo na kobanda ebongiseli ya liboso, bomoni. “Na bosolo, ekozala *boye*. Nzambe akosala yango te, oyebi.” Bomoni, ezali ndenge moko. Ezali ndenge moko lelo.

⁶² Sikawa tomoni ete mokambi yango ayaki epai na Yesu. Ya liboso, sikawa, ayaki koluka Bomoi na Seko, ayaki koluka lobiko. Ata bongo, azalaki moto ya lokumu, molakisi ya Yisalaele, kasi molakisi na Yisalaele ayaki epai na Moto oyo tozali ata na nsango moko te été akendekei na kelasi mokolo moko. Mobange na moto, mobange ya nganganzambe, moto na bwanya, ayei epai na elenge Mobali. Bazalaki bato ya lokumu mingi, mozui ayei epai na Mosengi-sengi oyo azalaki na esika ya kotia motó na Ye te, mpo na kotuna Ye nzela ya lobiko pe Bomoi. Mpo na kobanda, bato ya Sanhedrin yango, ndenge Nikodeme alobaki, bamonaki eloko moko kati na Yesu oyo bato mosusu ya ebongiseli na bango bazalaki na yango te. Bamonaki ete eloko moko ezalaki kati na Ye, mpo alobaki: “Lábi, biso toyebi ete Yo.” “Biso,” iyo, bakokaki kotatola yango te, mpo bakobengana bango. Bomoni? “Biso toyebi ete Ozali Molakisi oyo auti na Nzambe, mpo moto moko te akoki kosala makambo oyo Ozali kosala soki Nzambe azali na ye te. Toyebi yango!” Oh! la la! Ebongiseli!

⁶³ Sikawa, tomoni ete Yesu azalaki etaliseli ya Nzambe. Sikawa: “Moto moko te akoki kosala makambo oyo soki Nzambe azali na ye te.” Bayebaki ete eloko moko ya bokesene ezalaki kati na Moto yango. Azalaki Pole ya eleko wana. Azalaki Motatoli ya Nzambe.

⁶⁴ Kora pe amonaki eloko yango moko kati na Mose. Bazalaki na moto lokola Mose te na eleko wana. Azalaki motatoli-bonzambe ya Nzambe, na eleko wana, mpo na nguya ya Nzambe. Kora ná etóngá na ye bamonaki yango kati na Mose. Basosolaki ete ekokaki kozala Mose te; Mose akokaki kofungola Mai-nambu Motane te, Mose akokaki kotinda minyoko na mokili te. Ezalaki Nzambe kati na Mose, pe, lokola Nzambe Amitalisaki kati na motatoli to na pole ya eleko wana, bamonaki Yango te. Kora alingaki kosangisa etonga mobimba ya bato, mpo na kokotisa bango nyonso.

⁶⁵ Yango nde likambo ebongiseli eyebi kosala, kokotisa lolenge nyonso ya makambo esepelisaka miso, pe kobenga yango “Boklisto”. Kotinda mwana mobali na eteyelo, oyo eyebi Nzambe ata moke te, lokola Motswa oyo ayebi butu ya Ezipito te, kotinda ye kuna, kotángisa ye, kolakisa ye psychologie, kopesa ye Doctorat na Phylosophie, pe diplome ya doctorat to licence na lettres, to eloko moko to mosusu ya ndenge wana. Pe kotinda ye kokende koteya Nsango-malamu, ye oyo abikisámá naino te, ye akoangana mbotama na mongondo pe lisekwa, akoangana kobikisama ya bo-Nzambe, akoangana

Nguya na Nzambe, akoangana ntina mpenza oyo Yesu akufelaki, akoangana ete Malako 16 epemelami, akoangana “bilembo oyo ekolanda baoyo bakondima” ntango oyo Yesu Ye moko alobaki Maloba yango, akoangana Misala 2:38, akoangana Makomi mosusu oyo epemelami. Pe akoluka kozua mimesano ya bato oyo bayebi eloko moko te, pe akotingama na yango. Pe soki oyebisi bango Solo pe olakisi bango Solo, bakoyoka nsóni mpo na kokende liboso, mpo na ebongiseli na bango.

⁶⁶ Kora asalaki motindo moko. Amonaki Nzambe kati na Mose. Amonaki ete Mosaleli ya Nzambe nde azalaki kosala kati na ye. Pe Nikodeme amonaki Nzambe kati na Klisto: “Moto moko te akoki kosala makambo oyo soki Nzambe azali na ye te.” Nikodeme asilaki kozala kati na ebongiseli, azalaki koluka kobima. Kora azalaki libanda, azalaki koluka kosala yango mpo na komikotisa. Bokeseni ezalaki nde wana. Nikodeme azalaki koluka lobiko, mpo na kobima na likambo yango; azaláká kati na yango longwa bolenge, alembaki yango. Azalaki na mposa ya kobikisama. Kasi Kora azalaki koluka komisalela e—esika oyo akokaki kozala moto monene.

⁶⁷ Ezali bongo mpo na bato ya lelo. Yango nde likambo ya Boklisto, tozali mpenza na bomekoli ya lokuta mingi. Pe ba-Pantekotiste na biso, bólimbisa elobeli oyo, bapolí na yango, kokokanisa ya nzoto! Soki Nzambe atelemisi moto pe apesi ye eloko moko, bato nyonso na ekólo bakoluka komekola moto yango. Bozali kososola te ete bozali kopolisa equipe na bino moko? Ntango bobétaka lisano ya ndembo. . . “Pe ngolu,” ndenge Polo akomaki yango, “tópota mbangu na momekano oyo na motema molai.” Moto oyo azali na Ndembo, kobótola yango na maboko na ye te, luka nde kobatela ye. Kasi esika ya kosala bongo, lokola ye azali moto ya ebongiseli na bino te, bozali koluka kobótola ye Yango. Moto oyo azali na mwa bolembu, akoki te, abeti libaku na ba-felele oyo ezali na nse, na bongo, bazali koluka kobótola yo Yango. Ezali solo. Sikawa, nalingi koloba, na elobeli ya molimo. Bólimbisa ngai, ngai. . . Ee, akobéta libaku na likambo moke lokola Misala 2:38, akoki mpenza kokweya. Soki abeti libaku na Malako 16, akolónga ndenge nini? Bomoni? Hum. Ezali mpenza malakisi ya motuya ya Klisto. Pe makambo mpenza oyo balobelaki na Likita ya Nicée, bazali kokoba kobeta libaku na yango sima na mibu nyonso oyo.

⁶⁸ Koluka, Kora azalaki koluka kosala ebongiseli mpo na kokota na yango. Kasi Nikodeme oyo azalaki kati na yango pe azalaki koluka kobima libanda na yango. Nikodeme andimamaki, pe abimaki. Kora akufaki kati na yango, na makasi na ye, akufaki na makasi na ye moko. Oh! la la!

⁶⁹ Ebongiseli oyo Nikodeme azalaki kati na yango, eyebaki ete Klisto atindamaki na Nzambe, ezalaki koloba bongo. Nikodeme, awa, na mokapo ya 3, atatoli yango: “Rabi, toyebi ete Ozali Molakisi oyo atindami na Nzambe, mpo moto moko te akoki

kosala bikamwa oyo Ozali kosala soki Nzambe azali na ye te.” Pe bobele etónge yango, mpo na ebongiseli na bango, babengaki Ye “Belezebula”, mpo na Nguya na Ye ya kobengana milimo mabe, pe balobaki: “Azali kopéngwisa bato na biso na Malakisi na Ye.” Ezali ndenge moko lelo. Kopéngwisa nini?

⁷⁰ Yesu alobaki: “Nasalaka bobele makambo oyo esepelisaka Tata, Natósaka bobele Maloba na Nzambe,” mpo Azalaki Liloba. Akokaki kosala eloko mosusu te, bobele Liloba.

⁷¹ Kasi, mpo na ebongiseli na bango, mpo na lolenge na bango, bato basilaki kokangama na nsinga. Na mitema na bango bayebaki yango, kasi ebongiseli na bango epesaki bango kosalela yango. Na bongo, mpo na kokímela yango, mpo na kopekisa bato kolongwa na ebongiseli na bango (“bato nyonso bakómi kolanda Ye”), mpo na kopekisa bato kolongwa na ebongiseli na bango pe kolanda Solo ya Nzambe (Ye azalaki Solo “Nazali Solo, Pole”), mpo na kopekisa bango kolanda Yango, balobaki ete Azalaki kopéngwisa bato. Bókanisa naino! Moto oyo ayebaki na motema na ye ete Azalaki Nzambe, ete Nzambe azalaki kati na Ye (“moto moko te akoki koloba makambo oyo, to kosala makambo oyo, soki Nzambe azali elongo na ye te”), bayebaki yango, bazalaki koloba yango pe kotatola yango, na sima, babaluki pe babengi Ye “Belezebula, pe mopéngwisi ya bato”, bato na bango, “na Malakisi na Ye.” Oh! la la!

⁷² Nikodeme ayebaki ete Azalaki Mosakoli. Bongo, azalaki moko na ebongiseli oyo alingaki Nzambe mingi pe azalaki kobanga Nzambe mingi, pe asosolaki na nzela na Kondimana na Kala ete Moto oyo azalaki mpenza na kokokisama, kondimisama pe kotatolama, été azalaki Mosakoli atindami na Nzambe. Moto yango, nazali na limémia mpo na ye ata ayaki na butu, akómaki kuna. Aleki mosika mpenza ebele na batei na biso ya lelo, bango bakoya ata koya te. Nikodeme, sukasuka, akómaki. Na bongo, kokweisa ye te, soki yo okómi naino te. Nikodeme ayebaki ete Azalaki Mosakoli, na bongo, abangaki Nzambe. Aboyaki ete Moto yango, Pole ya eleko wana, ákende mosika na ye. Ata Ekeseneki ndenge nini, ata ebongiseli na ye elobaki ete Ekeseni, ye amonaki Nzambe kotatola Moto yango pe ayebaki ete Azalaki Mosakoli. Pe soki Azalaki Mosakoli, Liloba na Nkolo eyáka na mosakoli, pe Ayebaki makambo Azalaki koloba. Bomoni? Na bongo, akendeki epai na Yesu, alingaki koyeba lolenge ya kozua lobiko. Soki Moto yango azalaki Mosakoli, Liloba na Nzambe ezalaki elongo na Ye, pe Ayebaki nzela ya lobiko.

⁷³ Kasi likambo Nikodeme asengelaki koyekola ezali likambo oyo bato mingi lelo, ya bibongiseli ya lelo, basengeli koyekola. Likambo Nikodeme asengelaki koyeba, ezali likambo oyo bato ya lelo, ya bibongiseli oyo, basengelaki koyeba. Ye azalaki koleka Mosakoli. Ayaki epai na Ye mpo na kozua, kolobela Ye mpo átalisa ye nzela ya Bomoi, pe Yesu Ye moko azalaki Bomoi. Ye oyo azali na Mwana azali na Bomoi. Na bongo ayaki te, asengelaki

koya te mpo na koyekola malakisi moko, asengelaki koya mpo na koyamba Moto yango. Ezali pe bongo na mpokwa oyo! Libanga ya Litumu eboyami lisusu. Libanga ya Litumu ezali nini? Ezali Liloba, na ntembe te. Klisto, Ye azali Liloba.

⁷⁴ Asengelaki koyekola likambo moko. Akanisaki: “Ee, sikawa, Moto oyo azali Mosakoli, Azali mpenza Mosakoli.”

⁷⁵ Na bongo, soki botali malamau, Yesu ayanolaki na motuna na ye te, Apámelaki ye mpo na kozanga komona na ye. Koleka kozala Mosakoli, Azalaki Liloba pe Pole ezali-kongenga ya Liloba! Azalaki Nzambe kongenga na nzela ya esalelo, mpo na kondimisa ete ezalaki Nzambe kati na Moto. Azalaki Liloba. Yoane ya Liboso, mokapo ya 1 . . . ezali Santu Yoane, mokapo ya 1, nde elobi: “Na ebandeli ezalaki Liloba, Liloba ezalaki elongo na Nzambe, pe Liloba ezalaki Nzambe. Pe Liloba ekómaki nzoto, pe Efandaki elongo na biso.” Pe tálá Liloba na Nzambe ezalaki kongenga na nzela ya mwa nzoto ya bolembu ya Moto moko, pe ebomaki miso ya ebongiseli. Kasi Ayaki mpo na kozua bato moko na moko. Koleka kozala Mosakoli, Azalaki Liloba! Azali Bomoi. Ezali te . . . Azalaki na ntina te ya koteya bino Bomoi oyo ekoya, Azalaki Ye moko Pole yango! Azalaki Bomoi. Azalaki Pole. Azalaki Bomoi. Azalaki Bomoi ya Seko, Ezalaki kati na Ye, pe bobele Ye nde azali Mopesi na Bomoi ya Seko. “Ye oyo azali na Mwana azali na Bomoi.” Na bongo, ozali na . . . okoki kozala bobele na Liloba ya koteya Ye te, osengeli kozala na Ye.

⁷⁶ Okoloba: “Oh, bato bafandaka mpo na koyekola Biblia pe maloba nyonso na lokóta ya Greki, ndimbola na yango, bilembo ya bokomi pe bongo na bongo.” Kasi bayebi Nzambe ata moke te! Bomoni? Te! Ye oyo azali na—ye oyo azali na—na—na lolenge ya libanda, ye nde azali na mwango yango? Ezali ye oyo azali na Mwana, oyo azali na Ye, Moto yango. Ye nde azali na Bomoi.

⁷⁷ Nikodeme ayebaki ete Ye ayebaki likambo ya Bomoi, kasi ayebaki te ete Azalaki Bomoi na Seko. Yango nde likambo, Moto oyo azalaki kolobela, Motindami, Pole ya eleko, Pole ya mokili. “Pole ezali kongenga na molili, kasi molili eyebi yango te. Atindamaki na bato na Ye kasi bato na Ye bayambaki Ye te.” Mpo na nini? Mpo na nini? Mpo basilaki mpenza komibongisa, komipesa na makambo ya kosukola ba-mbéki pe ba-nzúngu, ná mimesano, kino bazángaki komona Liloba eláti nzoto.

⁷⁸ Esili kosalema. Esili kosalema lisusu. Makambo ya kala esalemaka bongo mbala na mbala. Iyo, ayebaki ete Azalaki na—Ayebaki Bomoi, kasi Nikodeme ayebaki te ete Azalaki Bomoi. Ezali pe bongo lelo. Bato mingi mpenza bamekaka kokómisa Yesu, oh, Molakisi monene, bamekaka ata koloba ete Azalaki Mosakoli. Kasi soki omeki koloba ete Azalaki Nzambe, ezali kolekisa ndelo. Bomoni? Kasi Azalaki Nzambe, pe Azali Nzambe, pe Akozala ntango nyonso Nzambe. Esili. Ezali solo.

⁷⁹ Bótala, sikawa, ntango Nikodeme ayaki epai na Ye, Ayebisaki ye ata moke te, Alobaki ata moke te: “Sikawa, Nikodeme, Nazali na limemia mingi mpo na yo, ndenge ozali mo—mo—molakisi na Yisalaele. Yoka malamumu, ozali koluka Bomoi na Seko, ntango mosusu osengeli kokóba koyekola lisusu. Elobeli na yo ezali malamumu mpenza te.” Bolema. “To, ntango mosusu osengeli koluka esika ya likolo koleka na ebongiseli na bino, mpo na kozua Bomoi na Seko.”

⁸⁰ Yango nde likambo bato mingi mpenza balukaka kosala lelo, ah-hah, esika ya likolo koleka, balingaka kolongwa kozala—kozala mokengeli pe kokóma moyangeli ya etúka, to—to epískópo to eloko moko ya ndenge wana. Likambo yango ezali ata na ntina moko te mpo na Nzambe.

⁸¹ Bótala eloko Asalaki liboso na moto ya ndenge wana. Apámelaki ye mpo ayebaki te eleko nini azalaki kobika na yango: “Olingi koyebisa Ngai ete ozali molakisi na Yisalaele pe okoki kososola makambo oyo te, ntango oyo,” Alobaki, “moto asengeli kobotama mbala na mibale?”

⁸² “Ee,” alobaki, “ngai mobange, nákota na libumu ya mama na ngai?”

⁸³ Alobaki: “Yo ozali epískópo, cardinal, moyangeli ya etúka na lingomba Pantekotiste,” to eloko mosusu, “moto monene na ebongiseli, pe oyebi Makomi te?”

“Oh, tozali na Mose.”

⁸⁴ “Soki bóyébaka Mose, bolingaki pe koyeba Ngai, mpo ye moto alobaki mpo na Ngai.” Bomoni? Kasi ekokanani te na mimesano na bango, ebongiseli na—na bango, ekeseneki. Kasi Mose alobaki mpenza mpo na Ye, pe Azalaki Ye oyo Mose alobelaki, kasi ata bongo, bayebaki yango te. Mpo na nini? Bakanganaki mingi bango moko na mimesano pe bayebaki yango te.

⁸⁵ Pe bandeko na ngai oyo bakotánga, baoyo bakoza bande oyo, bótelemisa yango te. Bózela naino, bótala likambo yango na bozindo. Nalingi bino, bozali babateli—mpate. Nalobi te ete nayebi—makambo—nyonso. Soki ezali kopesa yo likanisi yango, na bongo, télémisa bande pe bóndela mpo na ngai. Nazali bobele komeka kopesa bino likambo oyo ezali Solo. Bótika yango koleka pembeni na bino te.

⁸⁶ Sikawa, nazalaka na limemia na molongó ya bato, pe bongo na bongo, kasi ntango bosalaka bibongiseli oyo . . . Bótala Bafalisai, bazalaki na ntina ya Basadukai te, mpo Basadukai bandimaka ba—banje to—to milimo te, to lisekwa, to eloko moko te, kasi Bafalisai bazalaki na yango nyonso mibale, pe bazalaki kowelana. Sikawa ba-unitaire bandimaka eloko moko, ba-trinitaire bandimaka eloko mosusu, ba-Methodiste eloko mosusu, ba-Presbiterien eloko mosusu, pe botiaka mwa ba-ndelo. Pe bozui nini? Bokabwani ya bondeko. Na bongo, tokomona esika

yango na Biblia, na ntango moke, likambo yango, likambo oyo Nzambe alobi.

⁸⁷ Sikawa, te, Ayebisaki ye te ete ábakisa mayele. Apámelaki ye bobele azangaki koyeba likambo ya solo. “Ozali molakisi na Yisalaele, pe oyebi makambo oyo te? Soki nayebisi yo makambo ya mokili, pe ososoli yango te . . .” Bokanisa! “Molakisi, molongo ya likolo na lingomba orthodoxe, epískópo, cardinal, kasi okoki ata kososola te makambo mike-mike ya mokili, oyo Nazali koyebisa yo, ndenge nini okososola makambo ya molimo ya Likolo?”

⁸⁸ Kasi moínga ya mobange molóbi mbisi, oyo ayebaki ata kokoma nkombo na ye moko te, asosolaki Yango, bomoni, pe akómaki mokambi ya lingomba na Yelusaleme, Petelo. Bomoni? Oh: “Moto nyonso oyo Tata apésá Ngai, akoya.” Bomoni? Bakomona Yango. Bakondima Yango. Bakosalela Yango, koyeba ete eloko moko te ekopekisa bango.

⁸⁹ Ezali lokola mobokoli-bibwele. Ezali malamumu te koloba likambo ya kosekisa, kasi ezali mpo na kotalisa likambo. Elobamaki ete mobokoli-bibwele moko azalaki na soso ya mwasi, oyo abotaki máki mingi te, pe atiaki líki ya libata na nse ya soso. Ntango mwana-libata yango abótamaki, azalaki eloko ya ndenge mosusu mpenza na nyonso oyo bana-soso basílá komona. Azalaki na elongi molai ya ndenge mosusu, pe azalaki kotambola pe kosala kwee-kwee esika ya kosala kotkot, pe—pe bana-soso nyonso bazalaki kolia pe koluka bilei na lopango. Kasi oyo wana ezalaki mpenza bilei na ye te. Na bongo, mokolo moko mama soso amemaki ye sima ya lopango, mpo na kokanga mayoyo, pe li—libeke-na-mai moko ezalaki na ngambo ya ngomba. Pe esalemaki ete mopepe emataki longwa na libeke-na-mai yango, pe ayokaki nsolo ya mai. Ezali mpenza lolenge na ye. Mama soso alobaki: “Kot, kot, kot, kot, zonga awa!”

⁹⁰ Alobaki: “Kwee, kwee, kwee,” mbala moko na mai. Mpo na nini? Mpo na kobanda, azalaki libata. Ata soso alobaki kotkot ndenge nini, ye azalaki na ye libata.

⁹¹ Ezalaka pe bongo mpo na moto oyo abongisámá liboso mpo na Bomoi na Seko. Ntango amoni Pole ya Nzambe, bibongiseli nyonso ya mokili ekoki kozongisa ye na yango te, ata ndenge nini. Te. Mpo na nini? Ezali lolenge na ye. Akokaki kolia elongo na bango ntango molai, kolia bilei ezángá ntina ná ba-féti na bango, kasi ntango akokoma esika oyo akokutana na eloko ekeseni, boye ayebi yango. “Bampate na Ngai bayebi Mongongo na Ngai,” Yesu alobaki, “bakolanda mopaya te.” Ekoki kosalema été bálanda eloko moko ya ndenge mosusu, kasi kati na bango, ezali na eloko moko ya bokesene. Soki bayoki Sólo mokolo moko, bótala bango malamumu. “Baoyo nyonso Tata apésá Ngai bakoya.”

⁹² Iyo, Apámelaki ye mpo na kozanga koyeba. “Ozali molakisi na Yisalaele, pe oyebi makambo oyo te? Osengeli kobótama

mbala mibale!” Sikawa, moto ya mokili, nalingi ko... bótala malamumu likambo oyo: “Osengeli kobotama mbala mibale.”

⁹³ Sikawa, bomoi ya mokili, soki tozali na bomoi ya mokili, mpo na kokoka kosala likambo na bomoi ya mokili oyo, makambo ya mokili, tosengeli kobotama na mokili oyo. Bakoningisa nzete te mpo na kobimisa yo esika moko, bomoni, kobenda yo na lolenge moko to mosusu. Bamekaki yango, kasi esimbaki te. Esengeli kozala mpenza mbotama, kobotama na mokili oyo, mpo na kosala été ókoka kozala na biyokeli mitano, kotambola, kosolola, komona, koléta, komama, koyoka nsolo, koyoka, kotambola, pe bongo na bongo, mpo na ntango nde ozali moto, pe okoki—okoki kozala na makambo nyonso oyo mpo yango nde ezalaka na bomoi ya mokili oyo.

⁹⁴ Pe, na kobotama ya boye, ntango mosusu tokómaka na bwanya mingi na bwanya ya mokili to na makambo ya mokili, tokómaka Bakonzi-ya-mboka pe—pe bato ya mayele mingi, ba-ingenieurs, bato na zébi, pe bongo na bongo. Pe boyebaka yango, longwa ebandeli mpenza, bana ya Kaina nde bazalaki na bwanya ya ndenge wana; bana ya Seti te, bango bazalaki ba-bateli mpate ya komikitisa. Kasi bana ya Seti bazalaki bato babangaka Nzambe. Kasi bana ya Kaina bazalaki ntango nyonso bato ya mayele mingi, ya lokumu, bayékola mingi, balakisi pe bato minene. Ezali solo. Biblia elobi bongo, boyebi, Yango nde elakisi yango. Bazalaki basambeli mpenza, kasi na suka, bakufaki. Tokómaka na bwana ntango tokendeke kelasi, kozua ba-diplôme, pe bongo na bongo, tokómaka na bwanya mingi, na mayele mingi, mpo na kokoka kosala makambo, koloba makambo, pe ntango mosusu, koloba malamumu koleka moto oyo atondisami na Molimo. Yesu alobaki te ete: “Bana ya mokili oyo bazali na bwanya koleka bana ya Bokonzi”? Ya solo, mpo été bango, na mayele na bango bakoki—bakoki koloba, koleka na mayele, koloba malamumu koleka, kozua Makomi pe kobongola Yango mpo na kolobisa Yango makambo Yango elobi te.

⁹⁵ “Oh, elingi mpenza koloba bongo te.” Ntango moto alobi bongo, kende mosika na ye. Nzambe asénzelaka likolo ya Liloba na Ye, boyebi, elobi Biblia. Ekomami mpenza lolenge Esengeli kozala. Bomoni? Sikawa, Etiami bongo mpo na kopéngwisa, to kobétisa bato na mayele libaku likolo na Yango. Ezali mpenza pete, yango wana babétaka libaku likolo na Yango. Bomoni? Malamumu.

⁹⁶ Mayele nyonso oyo pe makambo bakoki kobakisa na yango, ata bongo, ezali kouta na... mbotama yango ezali kouta na nse, na mokili oyo. Euti na mokili, pe ezali kotelemela Molimo na Nzambe. Mbotama ya liboso, mpo na kosalisa biso makambo awa, ekomisi biso bato na kufa, mpo na likambo ya lisumu na elanga, oyo esalaki ete moto ábotama na mokili na nzela ya mwasi. Pe moto oyo abótami na mwasi azali na mikolo mingi te, kasi moto oyo abótami na Klisto azali Seko. Yobo

alobaki: “Moto oyo abótami na mwasi azali na mikolo mingi te pe atondi na mpasi.” Bótala, kasi moto oyo abótami na Klisto, asengeli kobótama longwa na Likolo. Kasi, sikawa, moto oyo abótami na mokili, akómaka mayele pe akoki kokóma na mayele mingi koleka.

⁹⁷ Bótala ndenge zabolo azalaki na mayele mabe, akosaki nganganzambe nyonso oyo azalaki koya na mokili. Asalaki yango mpenza. Azalaki kozóba bango, azali kokoba kosala yango. Iyo, ya solo. Azalaki mayele, kasi mokolo moko, akutanaki na Moto, oyo alongaki ye. Pe likambo se moko tosengeli kosala ezali koyékama likolo na Ye, Asílá kolonga ye. Bomoni?

⁹⁸ Kasi euti na nse, pe bwanya oyo moto abakisaka mpo na kotalisa pe kolakisa makambo nyonso oyo mpo na nini moto asengeli kosala *likambo oyo* pe moto asengeli kosala *likambo oyo kuna*, ekeseni pe etelemelaka (makanisi ya nzoto) Nzambe. Makomi elobi yango. Ya solo. Ata bazali mayele ndenge nini, bakoki kobulunganisa yango. Nalingi ete moto moko álakisa ngai esika moko oyo Nzambe asilá kosála ebongiseli to kosénga kosála yango, libanda na kokweisa yango awa na Biblia. Ata baluki kokóma mayele ndenge nini, ekeseni! Bwanya ekoki kotelema pe koleka yo na maloba ya komilongisa, pe kosala ete ómimona moke *mpenza* na kolobela yo yango, kasi ekeseni na Makomi.

⁹⁹ Moto moko alobaki na ngai: “Ndeko Branham, nazali na likambo oyo natelemelaka yo.” Alobaki: “Ozali moto ya Bobele Yesu.”

Nalobaki: “Nazali yango te. Nazalaka na ebongiseli moko te.”

¹⁰⁰ Moyangeli ya etúka moko abengisaki ngai, mokolo moko, pe alobaki: “Moto moko ayebisaki ngai ete ozali moto ya Bobele Yesu, Ndeko Branham.”

Nalobaki: “Yango ekeseni. Ezali lokuta.”

¹⁰¹ Alobaki: “Bayebisaki ngai ete ondimaka likambo ya bolingo ya bonsomi, ete mibali basengeli kotika basi na bango mpo na koluka. . .” Sikawa, bomoni, ezali mpenza lokuta ya zabolo. Boyebi yango.

¹⁰² Nalobaki: “Na ntembe te, natelemelaka makambo oyo ezali libanda na Makomi! Ngai nandimaka bosantu pe bopeto. Nandimaka ete mobali akangami na mwasi na ye ntango nyonso oyo bazali na bomoi.” Osengeli kobala ye te kozanga kobondela liboso.

¹⁰³ Pe Bobele Yesu, etónga ya Bobele Yesu, naboyi bango te, bazali malamú lokola bitónga mosusu nyonso, mpo na ngai. Kasi babatisaka mabe, babatisaka mpo na mbótama ya sika. Ngai nandimaka ete mbótama ya sika esalemaka na Molimo Mosantu, na mai te. Ngai nasalelaka Nkombo na Yesu Klisto na

libatisi, pe ezali na Likomi mosusu te kati na Biblia mpo na . . . mpo na kokesene na yango. Ata moto moko te kati na Biblia abatisamaki na nkombo ya “Tata, Mwana, Molimo Mosantu.” Nalingi ete moto moko áya kolakisa ngai esika moko oyo moto moko mpamba abatisamaki ndenge wana. Na bongo, soki ezali libanda na Makomi, bótika kosala yango!

Bokoloba: “Ekosala eloko moko te.”

¹⁰⁴ Esalaki eloko mpo na Polo. Atindaki bango bábatisama lisusu, na Nkombo na Yesu Klisto, na sima bazuáki Molimo Mosantu. Pe Polo alobaki: “Soki mwanje moko auti na Likolo,” Bagalatia 1:8, “ayeí koteya Nsango-malamu mosusu,” kokesene na oyo ye ateyaki, “álakelama mabe.”

¹⁰⁵ Bomoni, ezali momesano. Nasololaki na moto monene moko, kala mingi te awa. Alobaki: “Ndeko Branham, nakoki te. Nayebi ete Ezali solo,” alobaki, “kasi násala nini mpo na Yango?”

Nalobaki: “Tósa Yango!”

Alobaki: “Ee, na—nazali na lokumu mingi kati na bato na biso.”

¹⁰⁶ Nalobaki: “Kasi ngai nalingi lokumu mingi elongo na Nzambe, na bongo, tósá Liloba na Ye. Osengeli kopona, okosalela Nzambe to moto?”

¹⁰⁷ Kasi bazali na bibongiseli na bango, baktisi maloba na bango na kati, bazali kotosa mpenza yango. Mbala ya liboso oyo basalelaki yango, ezalaki na lingomba Katoliko ya Roma. Ezali solo. Nalingi ete moto moko álakisa ngai likambo moko kokesene na yango. Ngai pe natángaka histoire, boyebi. Boye, bómikanisela, ezali libatisi ya Katoliko, pe moto nyonso oyo abatisámá bongo, abatisámá mpo na kokota na bondeko ya Katoliko. Nakotalisa yango polele liboso tósilisa na mpokwa oyo, soki Nkolo alingi. Ezali solo. Yango wana bosengeli kozonga.

¹⁰⁸ Ezali likambo ya Bobele Yesu te. Sikawa, bato malamau bazali mingi na lingomba Bobele Yesu. Bato malamau bazali mingi na ba-Losambo ya Nzambe, na Lingomba ya Nzambe, na lingomba Metodiste, Batiste, Presbiterien, pe Katoliko. Kasi ata moko na yango te ezali Lingomba, ata moko na yango te. Bato moko moko kuna na kati bazali kati na Lingomba. Kasi ezali ebongiseli na bango te nde ekómisi bango Lingomba, ndenge bato balukaka kosala yango bongo. Ezali lokuta. Etikali moke mpo tókoma kopesa bino Makomi, sima na mwa ntango.

¹⁰⁹ Iyo, mpo na kosala makambo na mokili, osengeli kobotama na mokili mpo na kosala makambo, pe mbotama ya boye epesaka biso mayele ndenge nauti koloba. Bomoni? Pe tokómaka na mayele mingi, na mayele, lisosoli na biso epesaka biso yango. Kasi bóbosana te ete mbotama yango, ebandeli na yango mpenza, ezali na bokesene. Ezali ya mokili pe ekeseni na Liloba na Nzambe, ezali bolémá mpo na Nzambe pe mwango

na Ye, eyebani na mwango ya Nzambe te. Soki ezalaki bongo te, Nikodeme alingaki koyeba Yango malamumu koleka Yesu. Bomoni? “Ozali molakisi na Yisalaele?” Bomoni? Bomoni esika bibongiseli na bino ekendeke, esika bato na bino minene ya mayele, bakutanaka mpo na kosala miango, pe kofandisa yango?

¹¹⁰ Bótika náyebisa bino boye. Mbala nyonso Nzambe atindaka Pole na mokili, na eloko moko kati na Makomi, bato bakendeke nokí mosika na yango. Pe bobele ntango moto yango akei, bakómisaka yango ebongiseli. Pe bobele ntango bakómisi yango ebongiseli, nasengi na moyekoli nyonso ya histoire (oyo azali awa sikawa, to azali koyoka bande) áya kolakisa ngai. Mbala nyonso oyo moto akómisaka lingomba ebongiseli, ekufaki se wana pe etelemaka lisusu ata moke te. Ekeseni na Nzambe. Ekeseni na Makomi. Yango wana natelemalaka yango, eloko nyonso oyo Nzambe atelemelaka. Soki Nzambe azali kati na ngai, na bongo, nakotelemela eloko oyo Nzambe atelemeli. Moyini na Ye azali moyini na ngai. Lingomba na Ye ezali Lingomba na ngai. Bomo na Ye ezali Bomo na ngai. Apesaki Bomo na Ye, Akómaki ngai mpo ngai, na ngolu na Ye, nákoka kokóma lokola Ye. Bomoni? Topesanaki bisika. Akómaki mosumuki lokola ngai pe Akufaki mpo na ngai, esika na ngai, mpo ngai nákoka kokóma mwana na Nzambe, ndenge Ye azalaki.

¹¹¹ Sikawa bomoni esika bibongiseli na bino esili kokóma? (Naino tobandi te.) Mayele na bwanya ya mokili kasi basili kokúfa mpo na mwango na Nzambe! Sikawa tótala na sima, tótelema naino awa.

¹¹² Adama akeseneki na mwango ya Nzambe, mpo atósaki Liloba te. Amekaki komisalela ezipelo, losambo. Esimbaki te, pe ekosimbaka mokolo moko te, likambo moto alukaka kosala. Nimerode azalaki na libunga. Kora akufaki. Bazalaki koluka kosala nini? Kosala ebongiseli.

¹¹³ Pe, sima na yango, ntango basilaki komikómisa ebongiseli, Yesu akutaki bango, basili kokufa! Alobaki: “Bozali na miso kasi bozali komona te. Bozali na matoi kasi bozali koyoka te.” Bomoni? Alobaki: “Bozali bakufi miso, baoyo bazali kokamba bakufi miso. Soki mokufi miso akambi mokufi miso, bango mibale bakokweya na libulu te?” Alobaki: “Ozali molakisi na Yisalaele, pe ozangi ata makoki ya kososola eloko nini mbotama ya sika ezali? Nzokande, soki botangwaki mosika na mimesano wana mpo na kokangama na Liloba, bolingaki koyeba ete Nasengelaki koya kopesa bato mbotama ya sika. Bolingaki koyeba Mokolo na Ngai. Soki býébaka Mose, bolingaki koyeba Ngai. Mose alobelaki Ngai pe alobaki ete Nakoya, pe Ngai oyo! Pe soki Nazangi kosala makambo oyo Mose ná basakoli balobaki ete Nakosala, na bongo, bóndima Ngai te. Soki Nasali misala ya Nzambe te, na bongo, bóndima Ngai te. Kasi soki bokoki kondima Ngai te lokola Moto, pe bokoki kondima Ngai te mpo Nazali Moto pe Nazali kosala misala ya Nzambe, bóndima

misala mpo yango ezali kotatola makambo Ngai nazali kosala.” Bomoni?

¹¹⁴ Na boye, lokola lelo, soki Azalaki kobika na mokili lelo, ba-Losambo ya Nzambe balingaki kozala na moko, ba-Unitaire balingaki kozala na moko, pe bango nyonso balingaki kozala na Yesu moko. Ya solo, ebongiseli na bango nde esengelaki komema ndembo. Bomoni? Soki etamboli bongo te, bakozala pe wana te. Bakokabola bandeko.

¹¹⁵ Namikaniseli mwana-mobali moko na nkombo “Dawidi moke”. Azali mobali, asili kobala sikawa, nabanzi ete akómi na libota. Nazali komikanisela ntango abandaki kobanda. Nakende ki na Saint Louis. Nasila koyóká nsango ya bilenge mibali batei, komata na etumbelo pe koloba: “Yesu, elenge mobali, abotamaki na elielo ya bibwele. Mama, esukaki ndenge nini?” Kasi elenge mobali wana te. Alongoláki kazáka na ye, azuaki makomi pe ateyaki. Kasi azalaki nani? Esalemaki ete azalaki moto ya Bobele Yesu. Tata na ye, M. Walker, azalaki moto ya Bobele Yesu. Ee, ba-Losambo bakokaki kosepela na yango te. Basengelaki kozala na Dawidi moke na bango. Ee, bamosusu nyonso pe basengelaki kozala na Dawidi moke na bango. Pe mokolo moko, ntango mwana yango abongisaki mayangani na Floride, abengisaki ngai mpo nákende kosunga ye. Pe ngai ná Ndeko Moore totángaki nkasa mibale ya ebandeli ya zulunále, etóndaki na ba-Dawidi moke, losambo moko na moko ezalaki na Dawidi moke na bango. Oh, mawa mingi! Ee, soki lisangá ya bampaka ya Nzambe bándimaka likabo oyo ezalaki kati na elenge mobali yango, alingaki kokotisa milimo nkóto na nkóto na Bokonzi; bomoni, koyebisa ye ete átika mimesano ya bato ná makambo ya ndenge wana. Nzambe atiaki likabo na bomoi na ye, ásalela yango!

¹¹⁶ Ntango kobikisama ya Nzambe etalisamaki na ebandeli, bato nyonso bazalaki na koningana na maboko na bango pe bakokaki koyoka nsolo ya bokono. Pe, oh! la la! Mpo na nini? Basengelaki kosala yango, ebongiseli na bango ezalaki kolanda bango na sima. Bomoni, botii bibongiseli na bino liboso na mwango na Nzambe, bokanisi ete ezali bongo. Kasi Nzambe azali na Lingomba na Ye oyo ezali kokendé liboso motindo moko, Nzoto oyo emonanaka te. Bakotaka Kuna te, babotamaka nde kuna.

¹¹⁷ Bazali na mayele ya bwanya ya mokili, kasi basili kokúfa mpo na mwango na Nzambe. Na boye, bóyebisa ngai. Na boye, bóyebisa ngai. Okoki koyebisa bango pe kotalisa bango ete bazali na libunga, na nzela ya Liloba pe elaka na Nzambe, kasi ata bongo, bakomona yango te. Nakoki kofanda wana, kozua Liloba pe kotalisa bino ete ebongiseli ezali mabe. Nakoki kotalisa bino ete bindimeli oyo bozali na yango lelo ezali mabe, bomoni, bindimeli ya mangomba oyo. Kotalisa ete ezali mabe, kasi bakoloba: “Ee, biso tolakisamaki kondima *makambo oyo*.”

Bomoni, mpo na ngai, ezali—ezali bilei-ya-banyama, soki boyebi likambo nazali koloba, bato basalemi mpo na kobomama. Iyo, ezali solo. Bakoki komona te. Yesu alobaki: “Bino, bo—bokoki komóna te, mpo ‘te bókoka koya epai na Ngai mpo na kozua Bomoi.”

¹¹⁸ Nikodeme azalaki moto ya lokumu, moto monene, episkopo na lingomba na ye, moto na nkombo malamumu, alingamaki na bato nyonso, pe ayaki epai na Yesu kasi ayebaki likambo ya Bomoi te koleka—koleka bamosusu. Ayebaki Yango ata moke te ntango Yesu apámelaki ye mpo na yango, kasi azalaki mpenza sembo pe ayaki. Bamosusu baboyaki ata koya. Bazalaki mosika, elongo na ba-nganganzambe bakonzi ná Episkopo *Songolo* pe *Pakala*. Bomoni? Batelemaki mosika, elongo na bango, basepelaki kondima mimesano na bango, ya bampaka na bango, esika ya koyoka Liloba na Nzambe.

¹¹⁹ Sikawa, okoki koloba na bango, bakoyoka yango te. Bokoki mpenza. . . Bokoki kokanisa. . . Nalingi kotuna bino likambo moko. Nalingi kobetisa bino libaku te na likambo yango. Sikawa, bandeko oyo bazali koyoka bande, nalingi kobetisa libaku te na likambo oyo. Bokoki kondima ete wana nazali kotambola, pe—pe litútú ya nzete ékoka kotuna ngai: “Ndenge nini mpenza ozali kotambola-tambola ndenge wana? Ngai pe nazali na bomoi, nazali litútú ya nzete oyo?” Akoki kotalisa ete azali na bomoi, kasi ezali lolenge ya mabe. Soki alingi kotambola-tambola, nzela ezali se moko mpo ákoka kotambola-tambola, komona, koléta, komama, koyoka nsolo pe koyoka, soki akoki koloba mpo na koyebisa ngai pe kotuna yango, nzela se moko, asengeli kobotama lolenge moko ngai nabótámá. Amen. Akososola yango ata moke te na ndenge mosusu. Kasi soki abotami lolenge moko ngai nabótámá, bongo nde akoyeba makambo ngai nayebi. Amen. Oh! la la! Iyo, misie. Okoki koyebisa litútú ya nzete te ndenge biso totambolaka pe tosalaka makambo, ekosengela kozua bomoi ya lolenge na biso mpo na kososola yango. Motindo moko na Molimo! Likambo yango moko ezali na makambo ya Molimo, soki te, okoki kososola Yango te. Ntina ya koluka kososola Yango na ndenge na yo moko ezali te, yaka liboso epai na Ye. Mpo: “Soki moto abotami mbala mibale te, akoki ata komona Bokonzi te,” ndenge Alobaki, elingi koloba “kososola Yango”. Mpo na koyeba Yango, osengeli kobotama mbala mibale.

¹²⁰ Ee, okoloba: “Ngai nabótámá mbala mibale.” Pe ozali koangana Liloba? Ndenge nini okoki kobotama? Bomoi na yo moko ezali kotatolela yo yango, etónge na bino moko mpenza, esika osanganaka, baoyo bakokanaka bazalaka elongo. Bomoni? Bozela kino tókóma na makambo yango sima na miniti moke, bomoni.

¹²¹ Eyaka na nzela na Molimo. Ndenge nini okoki koyebisa bato oyo babótámi na Molimo te makambo ya Molimo?

Osengeli kobotama na Molimo mpo na kososola makambo ya Molimo. Bi. . . Yesu alobaki: “Mopepe epepaka esika yango elingi, okoyeba te nzela nini yango euti pe esika nini ekokende.” Bomoni? Ezali pe bongo na moto nyonso oyo abótámi na Molimo, bakoki koyebisa yo te. Moto oyo abótámi na Molimo andimaka makanisi ya bato te, atikaka ete Nzambe ákanisa.

¹²² Bokanisi ete nakoki kotelema awa na etumbelo, kozua se likanisi mpo na koloba na moto moko kuna na sima: “Nkombo na ye *John Doe*, auti esika *songolo*, asalaki likambo *boye*. Abalaki mwasi mosusu kuna, eleki mibu ntuku mibale, pe abótáki bana na mwasi yango. Asengeli kobongisa likambo *oyo*, pe kosala *boye*,” bokanisi, kozua se likanisi yango, nakokaki kosala yango? Ata mayele moko te na mbótámá awa na mokili ekoki kosala yango. Eleki yango mosika. Esengeli kouta na Likolo. Na bongo, ntango obotami na Molimo, na Likolo, Bomoi oyo ezalaki kati na Ye oyo asalaki makambo yango, alobaki: “Misala mizali Ngai kosala, bino pe bokosala yango.”

¹²³ Mbótámá na yo esengeli kobongwana. Opéngwisamaki. Okokaki ntango mosusu koloba minoko na sika, okokaki ntango mosusu kopumbwa-pumbwa, okokaki ntango mosusu kogánga, okokaki ntango mosusu kosala nyonso *oyo*, oyo *kuna* to *oyo mosusu*, okokaki kozala mondimi ya—ya sembo. Nikodeme pe azalaki bongo, bomoni, kasi azangaki mbótámá. Pe ntango ozali koangana Liloba, ozali koluka kotia Yango esika mosusu mpo na kosala na Yango eloko moko, pe kopalanganisa Yango ndenge wana. Na boye, Yesu alobaki: “Bilembo oyo ekobila baoyo bakondima. Bókende na mokili mobimba pe bóteya Nsango-malamu na bikelamu nyonso.” Ntango nyonso oyo Nsango-malamu ezali koteyama, bilembo oyo ekobila. Bólakisa ngai esika Alongólá yango na lingomba. Bólakisa ngai na Likomi esika Alobaki, asilaki koloba: “Bobebe mpo na ntango boye.” Alobaki: “Na mokili mobimba pe na bikelamu nyonso!”

¹²⁴ Iyo, osengeli kozua lolenge ya Bomoi oyo Ye azalaki na yango, mpo na kobika Bomoi na Ye. Pe ntango omoni Bomoi na Ye, nde okoyeba Liloba na Ye. Ezali solo. “Ntango Ye,” likitana bomei, likanisi te, mabanzo te, kongilima te, kasi “ntango Ye, Molimo Mosantu, akoya, Akozua makambo oyo Nayebisaki bino, Akopesa bino emoniseli na yango, pe Akolakisa bino makambo oyo esengeli koya.” Yango nde mbótámá. Yango nde etatolaka ete Ezali Liloba. Pen tango moto alobi ete azali na Molimo Mosantu, kasi aboyi Liloba na Nzambe pe atii Yango esika mosusu, ndenge nini Molimo Mosantu akoki koangana Liloba na Ye moko? Sikawa lakisa ngai ebongiseli kati na Liloba. Ezali yango mpenza. Bomoni? Malamu mingi.

¹²⁵ Bokoki kondima ete moto na mombongo. . . Sikawa, bótala mosika boni mangomba na biso etíkálá sima. Bokoki kondima ete moto na mombongo oyo afungoli mombongo awa, ezali. . . soki ezali mpenza mombongo ya kofúluka, asengeli kozua lisungi

noki-noki, pe akokende nde epai na bato bakúfá, bibembe, pe koloba: “Bokoki koya kosala mpo na ngai?” Bakosunga ye ata moke te.

¹²⁶ Yango wana bibongiseli elamukaka lisusu ata moke te. Bomoni? Etonga ya bakúfi bazángá kondima basangani elongo lokola Nimerode, lokola Kora, lokola bamosusu kati na bileko. Ndenge nini akoki. . . Asálélé yango naino ata moke te, Asálélé naino ebongiseli ata moke te. Akoki kosala yango te. Esílá kozala libanda na mokano na Nzambe, esílá koleka mosika na yango. Ekómi mosika mpenza, ekoki lisusu komonana te.

¹²⁷ Ndenge nini okoki kokende epai na moto oyo aninganaka te, oyo motó, loboko pe lokolo na ye esalaka lisusu te, pe olobi na ye ete ákende na emekaneli ya kopota mbangu mpo na yo, kopota mbangu yango na etingia, kotia pembeni. . . Bomoni? Akosala yango ndenge nini ntango oyo moto yango aninganaka te, binama ya nzoto esalaka te? Osengeli liboso kosilisa likambo na ye ya búkábuka, na sima akoki kopota mbangu.

¹²⁸ Yango nde bibongiseli basengeli na yango, basengeli na kobikisama ya bo-Nzambe. Oh! la la! Nakanisi été nazali komona. . . elobeli ya mpámela te. Bomoni, nazali kopámela te, kasi soki nsété ebetami malamau te, ebimaka na pètè. Bomoni? Yango wana Molimo Mosantu akoki kosalela ebongiseli te. Bobeles ntango yango. . .

¹²⁹ Bomikanisela, nandimaka ete Martin Luther azalaki na Molimo Mosantu. Na ntembe te. Ntango mosusu kokokana na eteni oyo Ezali lelo te, mpo Epesamaki te. Toyekolaki yango, bino bato ya mongombo oyo, awa na etánda. Kasi andimelaki mpenza Nzambe, “pe ye oyo andimi azali na Bomo na Seko.” Nazalaki kokanisa ata moke te ete moto moko andimaka yango lokola ngai, kino na ntongo ya lelo, nayokaki Charles Fuller ntango nazalaki kokita. Ye pe andimaka ete mbótámá ya sika ezali libatisi ya Molimo Mosantu te. Mbótámá ya sika ezali kobotama. Molimo Mosantu ezali libatisi. Bomoni? Malamau.

¹³⁰ Sikawa, tomoni ete moto oyo asengeli kobotama mbala mibale mpo ákoka kosala mosala. Malamau, kobotama na nzoto, ekopesa yo bwanya ya mokili. Pe bwanya ya mokili etosaka molakisi na yango ya nzoto. Ya solo. Yango wana nde bato oyo babótami mbala mibale te, soki oyebisi bango Liloba na Nzambe, bakotósa epískópo na bango, mokengeli-mokonzi na bango to ebongiseli na bango, esika ya Liloba ya Bomo. Mpo na nini? Ayebi eloko mosusu te, bobeles yango. “Ee, boyebi, mokolo moko ngai nakoki kokóma mokengeli-mokonzi.” Ee, Nikodeme azalaki molakisi. Yango elekaki kozala mokengeli-mokonzi, elekaki kozala mo—mo—mokengeli, elekaki yango, ye azalaki molakisi na Yisalaele. Bomoni? Iyo, pe azalaki moto monene, azalaki moko na etónge yango kasi ayebaki Nzambe ata moke te. Bomoni? Nyonso ayebaki, ezalaki masoló-ya-kala.

¹³¹ Nzambe ya masoló-ya-kala azali na ntina nini soki Azali motindo moko te lelo? Nzambe ya Mose azali na ntina nini soki Azali Nzambe yango moko te lelo? Nzambe oyo abikisaki moto na ekulusu azali na ntina nini soki akoki kobikisa moto na lolenge moko wana lelo te? Ndenge nalobaka ntango nyonso: “Ntina nini kopesa ndeke moke mbuma malamú ná vitamini, mpo mapapu na ye ékóma kitoko makasi pe nsálá na ye ézala kitoko, na sima otii ye na mwa ndako-ya-ebende?” Nasosolaka yango te. Soki omeki kolobela ye mpo na Nzambe na nguya pe nyonso wana, asili kokangama na ebongiseli oyo endimaka ata makambo ya ndenge wana te. Bomoni? Nyonso wana ezali libanda. Yango nde ntina esili kokweya, esili kokufa. Okoki kosalela yango te. Nzambe asálelá yango ata moke te.

¹³² Bókanisa naino, Molimo Mosantu asálelá naino ebongiseli ata mokolo moko te, esika moko te na Makomi to esika moko te na masolo-ya-kala. Soki moto moko, oyo akoyoka bande oyo, to azali awa, akoki kolakisa ngai esika Molimo Mosantu azuáki ebongiseli mpo na kosala mosala na mokili, áya koyebisa ngai. Nalingi bóyebisa ngai buku ya masolo-ya-kala oyo elobeli yango. Boyebi ete ezali na Makomi te, na bongo, nalingi bólakisa ngai masolo-ya-kala oyo elobeli. Nzambe asálelá naino eloko ya ndenge wana te. Asalelaka moto, ntango nyonso.

¹³³ Malamú, mpo na kobotama na Molimo. Sikawa, mpo na kobotama na nzoto, pe kozua bwanya ya mokili, bwanya yango ekotosa molakisi na yango ya nzoto. Kobotama na Molimo ezali kondima pe kotosa malakisi ya Biblia, na nzela ya Molimo Mosantu. Pe moto oyo abotami na Molimo akotosa Liloba na Nzambe ata mimesano elobi na ye nini. Ezali bongo. Obótámá mbala mibale, kotia elikia na yo nyonso na yango. . .

¹³⁴ Sikawa, nalobi te ete bato ya bibongiseli babótámá mbala mibale te. Sikawa, nakokóma wana sima na miniti moke, soki Nkolo alingi. Na ntembe te, bazali, kasi ezali bato moko moko. Ebongiseli ebótámá mbala mibale te; bato moko moko kati na yango nde babótámá mbala mibale. Kasi ebongiseli ezali bobele kokabola bango na Nzambe, nyonso wana nde esalaka, kokabola bino. Malamú. Kozanga kotala nzoto, bibongiseli eteyaka makambo ya nzoto, ezalaka ntango nyonso na bokesene na mokano na Nzambe.

¹³⁵ *Kobotama mbala mibale* elingi koloba “kobotama longwa na Likolo”. *Mbala mibale* elingi koloba “longwa na Likolo”. Nabanzi boyebi yango, bomoni. *Kobotama mbala mibale* elingi koloba “kobotama longwa na Likolo”. Sikawa, bokomona, bokoki koyekola yango soki bolingi, na lexique. Bomoni, elingi koloba “mbótámá oyo euti na Likolo”. Mpo, bosílá kobotama awa, sikawa mpo na kobotama mbala mibale bosengeli kobotama *Awa* na Likolo, mpo na kobotama mbala mibale. Na boye, Bokonzi yango ezali likolo mingi koleka bokonzi oyo,

monene mingi koleka bokonzi oyo, kino bokonzi oyo ezali bolémá mpo na oyo Wana, pe oyo Wana ezali bolémá mpo na oyo.

¹³⁶ Ndenge nalobaka mbala mingi, ngai ná mwasi na ngai, kala mingi te awa, tokendeki kosomba biloko, eleki mwa ba-sanza, pe tomonaki mwasi moko alati jupe. Ezalaki likambo ya kokamwa koleka oyo tomóná kala mingi.

¹³⁷ Sikawa, na ntongo oyo, nazali koloba yango te mpo na kotúka, nayokaki moko na bibongiseli minene ya lokumu koleka. Pe ngai ná mwana na ngai ya mwasi tozalaki kolanda radio ntango tokendeki mpo na kobulisa losambo moko. Pe loyembo moko bayembaki, ezalaki lokola eloko moko oyo *Songolo* ayémbá, na eyémbeli moko ya koyekola oyo, mpo na ngai, eyókanaka lokola basi oyo bakangaka péma kino bilongi na bango ékóma lokola bleu, bongo, bakanisi ete yango nde koyemba. Ezali kogánga. Ngai nalingaka eyémbeli malamumu ya kala ya ba-Pantekotiste, eutaka na motema. Okoki kobimisa mongongo malamumu na katíni ya makálá te, kasi ata bongo, ozali koyemba, kosala makeléle ya esengo mpo na Nkolo. Nakanisi ete ezali na molimo. Nalingaka yango. Kasi oyo ya kokanga péma kino elongi na yo ékóma lokola bleu, lokola okúfi, na sima ozongi lisusu, oyo . . . Yo moko oyebi ata eloko ozali koyemba te. Ndenge nini moto mosusu akoki koyemba yango? Yango mpenza. Yesu alobaki: “Tolobaka makambo toyebi.” Ezali solo. Ezali solo. Oyo tosengeli kosala ezali koyemba makambo toyebi na motema, makambo toyokaka na kati.

¹³⁸ Bongo ntango basilisaki, mwana na ngai ya mwasi ayekolaka mizíki, pe alobaki: “Ndeko mobali,” alobaki, “ezalaki mpenza lolenge ya koyekola na kelasi.”

¹³⁹ Nalobaki: “Iyo, kasi, na korále wana ya bato pene na ntuku mitano, okanisi ete bato boni bazalaki kolumba nsolo ya makaya? Okanisi ete bato boni na korále wana bazangaki komela masanga elongo na baninga, lobi na mpokwa, lokola mpokwa ya mokolo ya póso? Basi boni bazalaki kuna ná suki bakátá? Basi boni bapakolaki bikelákela, lokola mokengeli ya losambo yango, eleki mwa mikolo, alobaki: ‘Nzambe akómisaki mokili kitoko koleka ntango Asalaki bikola-pakola’”? Na ntango oyo, toyebi ete bebele mwasi bebele, na Biblia, apakolaki-pakolaki elongi na ye, pe Nzambe akabaki ye lokola bilei na ba-mbwá. Pe biso, moto nyonso oyo ayebi makambo ya lingomba pe ya bapakano, ayebi ete kopakola-pakola ezali ezaleli ya bapakano, ezalaka bongo ntango nyonso. Kasi, ata bongo, basi bazali kosala yango. Pe mibali bazali komela makaya, komela masanga, kobika bomoi ya mbindo. Pe bazali wana koyemba, ná mingongo ya ndenge wana. Tokokóma wana sima na miniti moke awa. Malamumu. Bazali na makanisi ya bibongiseli, ntango oyo, mpo na ngai, bato bakosutuka na Kosambisama.

¹⁴⁰ Kobotama na Molimo, ezali kondima pe kobika kati na Molimo, ezali kososola pe kondima na motema na yo ete Yesu azali Klisto pe Oyo ezali Liloba na Ye, pe maloba mosusu ekoki kobakisama ata moke te likolo na Yango to kolongolama na Yango na lolenge ete nkombo na yo ekoki kolongolama na Buku na Bomoi. Ezali maloba makasi. Soki obakisi eloko moko na Yango, ya mimesano na bino, to olongoli eloko moko na Yango, ee, Klisto Ye moko alobaki: “Nkombo na yo ekobomama na Buku na Bomoi.” Sikawa, luká ebongiseli, bibongiseli kati na Biblia. Bokokíma yango! Malamu. Kozanga kotala nzoto, malakisi ya bibongiseli ekeseni na Biblia. Iyo. *Kobotama mbala mibale* elingi koloba “Mbótámá ya sika longwa na Likolo; kobotama longwa na Likolo”. Na ntango wana tokoki kosala mosala na makambo ya Likolo. Oh! la la! Mpo Ezali Ye moko nde azali kosala mosala kati na Liloba na Ye na nzela na yo, etápe na Ye, na Mobímbi.

¹⁴¹ Yango wana Yesu alobaki: “Soki Nazali kosala misala ya Tata na Ngai te, bóndima Ngai te.” Oh, ya solo mpenza! Alobaki: “Moto moko te asilá komata na Likolo, bobele Ye oyo akitaki longwa na Likolo.” Bótala ndenge Azali kosémbola Nikodeme awa, ntango Nikodeme. . . Boyebi, bakanisaki, Ye lokola Moto, Akokaki kozala Nzambe te. Pe Alobaki, pe kuna Alobaki: “Moto moko te asilá komata na Likolo, bobele Ye oyo akitaki longwa na Likolo, Mwana na moto oyo azali sikawa na Likolo.” Oyo wana elekelaki ye mpenza. Ndenge nini Ye, Mwana na moto, akokaki kokita longwa na Likolo, kokita longwa na Likolo; ezalaki bobele Ye oyo amataki na Likolo; pe Ye moko oyo ateleme awa likolo ya ndako oyo, kosolola na Nikodeme, pe Azalaki na ntango wana na Likolo? Ee, asengelaki komona ete ezalaki Nzambe. Azali bisika nyonso, bipai nyonso! Bomoni? Kasi ye, na mimesano na bango, ayebaki yango te. Azalaki na makanisi ya molimo te. Azalaki na makanisi ya nzoto, pe akokaki kososola yango te.

Alobaki: “Bato balobaka ete Ngai Mwana na moto nazali nani?”

“Bamosusu balobaka, ee: ‘Azali Mwana na Dawidi.’”

¹⁴² Alobaki: “Na bongo, mpo na nini Dawidi, kati na Molimo, abengaki Ye ‘Nkolo’, alobaki: ‘Nkolo alobaki na Nkolo na ngai: “Fánda na loboko na Ngai ya mobali, kino Nakotia banguna na Yo na nse ya makolo na Yo”?”” Mpo Azali Mosisa pe Momboto na Dawidi; Azalaki liboso na Dawidi, Azalaki Dawidi, pe sima na Dawidi. Bomoni? “Azali Mosisa pe Momboto na Dawidi,” Biblia nde elobi bongo, Mosisa pe Momboto na Dawidi. Na bongo, ndenge nini Akokaki kozala Mwana na Ye? Ndenge nini Akokaki kozala Nkolo na Ye? Biblia elobi: “Kobanda wana batunaki Ye lisusu motuna moko te.” Nabanzi ete ezalaki pe likambo moko ya malam. Iyo, misie. Malamu.

¹⁴³ Kobotama mbala mibale longwa na Likolo. Sima na yango, tokobanda mosala, mosala na makambo longwa na Likolo, pe, mpo été Bomoi na Ye ezali kati na biso, yango ezali Liloba na Ye oyo ezali kotatola Liloba Yango moko. Molimo oyo ezali kati na yo ezali Liloba ekómi nzoto kati na yo. Molimo ekanisaka Liloba, pe esalaka mosala ya kotatola Liloba.

¹⁴⁴ Sikawa, Molimo esalaka mosala na ebongiseli moko te. Esepelaka kosala bibongiseli te, mpo Molimo Yango moko ekeseni na bibongiseli. Bibongiseli ezali koluka makambo ya mokili, makanisi ya mokili, bazali kotonga ba-témpelo ya minene pe makambo ya kitoko mpenza, bibongiseli minene ya kitoko mpenza, na batei bayekoli mingi, pe bongo na bongo ndenge wana, pe bazali bato ya lokumu koleka na engumba. Nzokande, Molimo azali koluka kozua mitema ya sembo esika Molimo azali na mposa makasi ya komonisa pe kotalisa polele ete Liloba na Nzambe nyonso ezali Solo. Ndenge nini bokoki, ndenge nini Molimo akoki kosala kati na ebongiseli, wana ezali koangana, kozua bindimeli esika ya Liloba? Akoki kosala yango te. Na bongo, bomoni, esili kokufa. Nzambe akendeke na bisika ya ndenge wana te mpo na kozua ba-bato na Ye, mpo na kosalela Ye, mpo basili kokufa. Bazali bazangi kondima ya Liloba, soki te, balingaki kozala kuna te. Bomoni? Sikawa, tozali kosala mosala na makambo longwa na Likolo. Sikawa, Molimo ekanisaka Liloba. Sikawa, ezali solo, mpo Molimo nde epesaka Bomoi ya Liloba. Bomoni? “Nkomá ebomaka; Molimo epesaka Bomoi.”

¹⁴⁵ Sikawa, ntango nazalaki koya awa lelo, nazalaki kotala banzete minene kitoko kuna na zamba, ba-ngomba minene, ná nkasa ya sokolá, ya motáne-so, ya mai-ya-pondu ná matóno kati na yango. Nalobaki: “Boyebi nini yango ezali?” Nalobaki: “Touti kozala na liwa, pe Nzambe abimisi libóké na Ye ya ba-felele, atelemisi yango likolo na ba-ngomba. Ezali ba-felele ya matánga. Bomoi esili kozonga na putulú. Nzambe auti kokunda mimboto na Ye nyonso, oyo euti na ba-felele pe nyonso mosusu, akundi yango, pe Abimisi libóké na Ye. Azali kotala mabelé mpo ezali ba-felele ya matánga. Kasi ntango moi ekobima lisusu, mimboto yango ekozua lisusu bomoi.” Amen. Malamu.

¹⁴⁶ Molimo esepelaka kotatola Liloba. Kasi soki oyambi mimesano esika ya Liloba. . . Sikawa, okoloba: “Ee, tondimaka Yango nyonso, kasi, Ndeko Branham, nayebi ete tondimaka *Oyo* te.” Na boye, wana nde esika bosuki mpenza.

¹⁴⁷ Moteyi-ya-basoda moko ayebisaki ngai mokolo moko ete ye. . .ete ka-kapiténe moko alobaki, to nakanisi ete ezalaki major, alobaki: “Moteyi-ya-basoda, kende kuna, kapiténé moko azali kobunda na liwa. Azuaki masasi ya mitrailleuse.”

¹⁴⁸ Akendeke kuna, pe kapiténé yango azalaki kobunda-bunda. Babendaki ye kino na héma ya Croix-Rouge, pe alobaki: “Kapiténe.”

149 Atombolaki miso wana makila ezalaki kobima, pe alobaki: “Iyo, misie.” Pe alobaki: “Ozali moteyi-ya-basoda.”

“Iyo.” Alobaki: “Ozali kokufa, kapiténe.”

Alobaki: “Nayebi yango.”

Alobaki: “Ozali Moklisto?”

Alobaki: “Nazaláká yango.”

150 Alobaki: “Otíká Ye wapi, kapiténe?” Alobaki: “Okokuta Ye bobele esika otíkáki Ye.” Ya solo.

Kapiténe alobaki: “Nakoki koyeba te.”

151 Moteyi-ya-basoda alobaki: “Ezali malamumu mpo na yo, otikali bobele na miníti moke mpenza, ndenge ozali kobunda-bunda.” Monoko efungwamaki, makila ezalaki kobima ye na monoko pe na matoi, mpo masasi ya mitrailleuse elekaki na nzoto na ye. Alobaki: “Ezali malamumu kosala noki, ba-poumons na yo ezali kotondisama.”

152 Pe kapiténe abandaki kotambwisa makanisi, alalaki wana pe azalaki kobunda-bunda. Komungamunga eyelaki ye na elongi, alobaki: “Nayebi sikawa.”

Alobaki: “Otíkáki Ye wapi? Bandá bobele wana.”

153 Alobaki: “Sikawa nakoki kolala mpongi.” Esika atikaki Ye, esika wana nde akokuta Ye.

154 Ntango ebongiseli na bino ezali kotea likambo oyo ekeseni na Liloba, otiki Ye bobele wana. Zonga noki-noki, mpo Azali kosala mosala na kotatola pe kokomisa Liloba yango solo. Yango nde Yesu azalaki, azalaki ntango nyonso kosala mokano ya Tata. Bomoni? Malamumu.

155 Na bongo, bomoni, lisosoli ya ebongiseli ya Nikodeme ezalaki na ntina moko te mpo na Nzambe. Sikawa, ata azalaki moto ya motuya, ndenge tobengaka yango, na ebongiseli yango, molakisi na Yisalaele, koyeba pe lisosoli na ye nyonso ezalaki na ntina moko te [Ndeko Branham alelisi mosapi na ye—N.D.E.] ntango azalaki liboso na Klisto, azuaki bobele mpámela. Sikawa, nakanisi ete bato nyonso bazalaki koloba: “Tata mosantu, Nikodeme. Tata mosantu, Nikodeme. Lokumu na yo, misie.” Kasi ntango Yesu, ntango atelemaki liboso na Nzambe, Apámelaki ye mpo na bozangi koyeba na ye. Na bongo, bomoni, esika nyonso wana ekendeke, bóbosana yango! Bóya, tókende epai na Nzambe. Ezali solo. Malamumu.

156 Lisosoli monene ya Kora pe ezalaki na ntina moko te, to ya Adama, bango nyonso baonganaki Nsango etatolami ya Nzambe. Sikawa, tóyoka na bokebi sikawa, tolingi kokóta na mai ya bozindo sikawa. Bomoni, moko na moko na bango, ntina oyo bakotaki na mobulu, Nikodeme, Kora, Nimerode, pe bamosusu wana, ezali mpo bazangaki koyeba motindami ya Nzambe, oyo azalaki na Liloba etatolami ya eleko wana. Sikawa, moto nyonso

ayebi yango. Sikawa, tokoki kolobela yango ntango molai. Kasi ntango Nzambe asakoli pe alobi ete likambo moko ekosalema; moto asalaka ebongiseli, kosala ete moto átíama mpenza wana. Bandimaki ete Masiya moko akoya. Oh, Bayuda yango, oh! la la! na ntembe te! Kasi ntango Yesu ayaki ndenge Ayaki, balobaki: “Ekoki kozala Ye te.” Bazangaki kososola Liloba. Sikawa, Yesu ayaki kokesene na Liloba te (boye te?), kasi Ayaki kokesene na ndimbola ya Liloba ya bibongiseli. Mose ayaki kokesene na Liloba te, ayaki mpenza kokokana na Liloba; kasi Kora azangaki komona yango. Pe esalemi bongo kati na bileko nyonso.

¹⁵⁷ Sikawa, bótala. Nsango oyo ya eleko ekoki kozala te bobele eloko moko ya koloba “biso tozali na Solo pe tozali na eloko *boye, na boye,*” esengeli kolobama liboso na Liloba na Ye! Na sima, sima na Liloba koteyama, esengeli kotatolama ndenge elongobani na nzela ya Liloba.

¹⁵⁸ Yesu atatolamaki ndenge elongobani na Nzambe, na nzela ya Liloba. Alobaki: “Soki báyébaki Mose, bolingaki koyeba mokolo na Ngai.” Ya solo basakoli balobelaki Ye, ya solo basakoli nyonso balobaki nani Ye azalaki. Kasi ata bongo ebomáki bango miso, bakokaki kososola yango te. Bomoni? Kasi Yesu azalaki. . . Sikawa bózanga te. . .

¹⁵⁹ Nalingi koloba likambo oyo mpo na bande, pe mpo na bino. Bomoni, motindami ná Nsango ya eleko!

¹⁶⁰ Sikawa, soki okei, ba-Adventiste ya mokolo ya Nsambo balobaka: “Tozali na yango, totósaka Sabata!” Lakisa ngai yango na Makomi. Madame Eddy Baker alobaki ye azali na yango. Lakisa ngai yango. Ba-Témoin de Jéhovah balobaki ete bazali na yango. Bólakisa ngai yango. Bomoni? Ba-Methodiste balobaka ete bazali na yango. Bólakisa ngai yango. Ba-Batiste balobaka ete bazali na yango. Bólakisa ngai yango. Bólakisa ngai ebongiseli moko. Nazali kotalisa bino yango polele, été bango nyonso, bazali libanda na mokano na Nzambe. Bango nyonso bazali na bokesene, bazali kolakisa mimesano ya bato esika ya Liloba na Nzambe. Nayebi ata moko te na bango, oyo endimaka makambo oyo ekomami mpenza na Biblia ndenge Yango ezali. Ezali solo. Kasi ntango moto moko ayei koloba: “Nazali na Nsango ya eleko,” asengeli liboso komonana liboso ndenge elongobani pe kosakolama ete akoya.

¹⁶¹ Ntango Yoane Mobatisi abimáki kuna, balobaki: “Ozali Klisto?”

Alobaki: “Te.”

Balobaki: “Ozali—ozali—ozali Eliya?”

Alobaki: “Te.”

Alobaki: “Ozali nani?”

¹⁶² Akokaki komitalisa, azalaki na Nsango ya eleko wana. Alobaki: “Nazali mongongo na ye oyo azali kogánga na biliki,

ndenge mosakoli Yisaya alobaki. Sikawa, soki kobotama pe bomoi na ngai ekokanaki na yango te, bó—bóyamba ngai te.”

¹⁶³ Ntango Yesu ayaki, ezalaki ndenge moko, ndenge moko. Motindami ná Nsango, esengeli kozala Nsango oyo esakolama liboso na Nzambe. Na sima, ntango Nzambe akoloba na nzela ya motindami yango, akotatola ete ezali Solo. Boyoki yango? Bosósóli yango? Bósosola yango! Esengeli liboso kozala YANGO ELOBI NKOLO, esakolama liboso. Na sima, motindami ná Nsango, basengeli mpenza kokokana na likambo Nzambe alobaki ekokokisama na eleko yango.

¹⁶⁴ Ndenge wana nde Mose azalaki. Yango wana atiaki elongi na nse liboso na Nzambe, pe alobaki: “Nzambe, Yo nde otindaki ngai.”

Alobaki: “Kabwáná na bato wana.”

¹⁶⁵ Bomoni likambo nalingi koloba? Ezalaka ntango nyonso likambo oyo ebebisaka makanisi ya bato, pe ebimisaka bango na mokano na Nzambe. Sikawa, bomikanisela, esakolamaki liboso na Liloba na Ye pe etatolamaki ndenge elongobani na Liloba na Ye. Sikawa, Yesu alobaki: “Soki Nasali te misala oyo . . . ya Nzambe, na boye, bóndima Ngai te. Bomoni, soki Nazangi . . . Tala, nani kati na bino akoki kokweisa Ngai na lisumu? Nani kati na bino akoki kolakisa Ngai ete Nazali mozangi kondima?”

¹⁶⁶ Nikodeme alobaki: “Toyebi ete Ozali . . . Molakisi, Outi na Nzambe, mpo moto moko te akoki kosala makambo yango soki Nzambe azali na ye te.” Bomoni? Na bongo, elakisaki ete Azalaki mondimi.

¹⁶⁷ Sikawa, biso baoyo toyebi masolo ya lingomba. Sikawa, bókanisa naino malamú. Ntango eleki naino te, bomoni, na bongo bóyoka na bokebi mpenza sikawa pe nakomeka kokende nokinoki mpenza. Na—nalingi . . . Bóyoka bande oyo na bokebi. Sikawa, moto nyonso oyo asílá kotánga masolo ya lingomba, ayebi ete mbala ya liboso oyo ki-Boklisto ekómaki ebongiseli, ezalaki lingomba Katoliko ya Roma. Sikawa, soki esalemaki na ntango moko liboso na yango, nalingi ete moto moko ámema masolo-ya-kala yango mpo na kotalisa ngai. Nazali moninga ya motema ya Paul Boyd, pe bato minene oyo bakoma masolo-ya-kala. Kuna na biró na ngai, nazali na ba-buku ya *Likita Esalemaki Sima Na Nicée, Likita Ya Nicée, Ba-tata Ya Nicée*, mikanda mosantu nyonso ya lingomba, oyo nayebe. Nayekolaki yango mibu ntuku misato na misato, natalaki yango malamú mpenza. Ebongiseli ata moko te ezalaki. Lingomba Katoliko ezali mama na bibongiseli. Toyebi ete ezali solo. Lingomba ekómaki naino ebongiseli te, ezalaki na ebongiseli te, kino lingomba Katoliko. Pe elobeli oyo *katoliko* elingi koloba “ya mokili mobimba”. Basalaki losambo ya lingomba ná letá, batiaki bokonzi na yango likolo na bokonzi nyonso ya Roma, pe na ntango wana, esilaki kolonga bi—bisika mingi ya malamú na

mokili. Ezalaki lingomba ya letá, pe baoyo bazalaki kotósa yango te bazalaki kobomama. Likita ya Nicée, mikolo zomi na mitano ya bitumba ya nsomo, ntango basakoli ya solo ya Nzambe, ntango batelemaki kuna likolo na . . .

¹⁶⁸ Lingomba Katoliko, ntango ebandaki na ebandeli, ee, biso nyonso toyebi yango, nateyaki yango awa. Ndenge, mpenza, Akila ná Prisila, azalaki mokengeli, Akila azalaki mokengeli na—na lingomba ya Roma. Ntango Molimo Mosantu ekitaki mokolo ya Pantekote, Ekitaki likolo na Bayuda, libanda na mabota nyonso ya mokili. Kasi sima na mwa mikolo, Petelo azuaki emononeli likolo ya ndako, ete ákende epai ya Koloneli, mo-Róma, moyengebene, abondelaki pe Molimo Mosantu ekitelaki ye. Sima na mikolo, bato ya lokumu babandaki koyamba Yango. Akila ná Priska bakendeke na—na Roma pe babongisaki, to, basalaki ebongiseli te, kasi batiaki na molongo lingomba ya liboso ya Roma. Pe, ntango basalaki yango, bazalaki na bandeko na bango—bango mibali pe basi.

¹⁶⁹ Pe Klodius, na eleko ya bokonzi na ye, abenganaki Bayuda nyonso na Roma. Pe na ntango wana mpenza nde lingomba Katoliko ya Roma elobaki ete Petelo azalaki na Roma. Bólakisa ngai Likomi moko oyo elobi ete Petelo akómaki na Roma, to masolo-ya-kala oyo elobi yango. Azalaki te, kokokana na Liloba na Nzambe, pe Yango nde nandimaka. Ndenge nini Petelo, Moyuda, akokaki kosangana na losambo ya bikeko, ná makambo ya pamba oyo bazali na yango, ya kosambela bikeko pe makambo mosusu? Esika nini . . . Bomoni? Ndenge nini akokaki kotelemela malakisi na ye moko awa? Bolémá. Ba-Protestant pe bazali bobele bongo. Bózela, tokokóma na yango sima na ntango moke, kala mingi te, soki Nkolo alingi. Botala. Botala sikawa, tomoni ete bobele ntango oyo lingomba elobi ete Petelo azalaki na Roma, masolo-ya-kala elobi ete Klodius (Biblia pe elobi yango) apesaki mitindo ya kobimisa Bayuda nyonso na Roma.

¹⁷⁰ Pe Polo alekaki na Efese pe akómaki na mabóngo ya likolo kuna, akutani na bayekoli oyo, pe kuna, akendeke kotala Akila ná Priska. Sima na bango kobima, nde bandeko ya Roma, kati na lingomba yango, babandaki kobongisa makanisi na bango moko, pe babakisaki losambo ya bikeko. Na sima, Constantín, oyo mama na ye azalaki Moklisto ya solo pe azalaki na elikia mpo na mwana na ye, kasi azalaki moto ya politíki. Amonaki ete bato mingi na Roma, to eteni monene na yango, kati na babólá, basilaki koyamba lobiko na nzela ya Klisto. Na sima, babandaki koyebana mingi na bato, mpo bazalaki kokitisa Venus mpo na kotombola Maria, kokitisa Jupiter mpo na kotombola Petelo, pe bongo na bongo ndenge wana ná—ná bayekoli, pe ekomaki losambo moko eyebani mingi na bato. Pe bazalaki na mpiko. Bango, Baklisto yango bazalaki kondima liwa!

¹⁷¹ Pe lingomba Katoliko elobaki: “Biso nde tobandaki.” Ezali mpenza solo, lingomba Katoliko ebandaki Mokolo ya Pantekote.

Kasi bótala eloko ebimisaki ye libanda, akómaki ebongiseli pe akotisaki biyambweli (longwa na Liloba). Pe eyambweli ya suka, bino baoyo bozali na mibu koleka zomi bokoki komikanisela eyambweli ya suka awa, konétolama ya Maria, eleki pene na mibu zomi. Eyambweli mosusu ebakisamaki na lingomba. Esika ya Makomi, ezali eyambweli! Pe bakoyebisa bino mpo na koyeba sikawa, “bazali na ntina ya oyo Makomi elobi te, ezali makambo oyo lingomba elobi”.

Bango, sánzó wana ayebisaki ngai, alobaki: “Nzambe azali kati na lingomba na Ye.”

Nalobaki: “Nzambe azali kati na Liloba na Ye.”

¹⁷² Alobaki: “Ee, Biblia wana ezali bobele masolo ya lingomba Katoliko ya ebandeli.”

¹⁷³ Nalobaki: “Boye, ngai nazali mo-Katoliko ya ebandeli.” Nalobaki: “Yango ezali kokomisa ngai mo-Katoliko koleka yo, ata ozali sánzó.” Bomoni? Nalobaki: “Soki ezali bongo, na boye, nazali yango.” Nalobaki: “Omoni, ngai nandimaka mpenza makambo bantóma balakisaki. Yo ondimaka makambo bato bakotisi kati na yango.” Pe ebandaki mpenza ndenge wana. Na ntembe te, ezalaki bongo. Ebandaki bongo, ndenge wana mpenza.

¹⁷⁴ Sikawa botala masolo-ya-kala malamumu. Na sima, bakómaki kobakisa biyambweli, eyambweli. Bongo, ntango Polo ayaki, toyebi, kokokana na masolo-ya-kala, akendeki ata kotala lingomba yango ya ebandeli te, mpo akokaki kosepela te na losambo ya bikeko. Pe akendeki kotala lingomba ya mibale oyo basiláká kobanda, lingomba ya mibale ya Roma.

¹⁷⁵ Pe ntango Likita ya Nicée yango esalemaki, esika Constantin azuaki likanisi ya kosangisa bokonzi na ye. Likambo yango moko asalaki na Yezabele, ya kobalana kuna. Bomoni? Pe ntango amonaki libaku malamumu ya kosangisa bato na ye mpo na kokómisa yango ekólo monene ya nguya, akanisaki ete bakoyamba losambo na bango, na bongo, akomisaki bango losambo ya lingomba ná letá. Pe ntango basalaki Likita yango ya Nicée, pe mituna etunamaki, soki Nzambe azali moko, to misato; soki basengelaki kobatisa na Nkombo na Yesu Klisto, to Tata, Mwana pe Molimo Mosantu; mituna nyonso mosusu wana etunamaki kuna, mpo na—na kosukisa likambo. Pe, ntango esalelamaki, mibange basakoli babimaki kuna, baláti bobele mposo ya mpate bamizingi na yango, pe bazalaki kolia matiti. Ya solo! Kasi bato minene ya lokumu wana oyo basilaki komikotisa na lingomba, bakangaki bango minoko ná bwanya ya mokili. Kasi bango bazalaki na YANGO ELOBI NKOLO. Lingomba ekotaki na molili ya bopakano pene na mibu nkoto mobimba.

¹⁷⁶ Kasi emonanaki lisusu, mpo na kofungwama. Ezali solo. Bokoki koboma Yango te. “Nakozongisa, Nkolo alobi, mibu nyonso oyo biloko yango eliaki.”

177 Bibongiseli yango ebakisaki biyambweli. Mpo na kosala yango, mpo na kobakisa biyambweli, nzela se moko lingomba nyonso, nzela se moko ebongiseli nyonso ekoki kotangwa na Liloba na Nzambe, ezali kobakisa biyambweli esika ya Makomi mosantu, ezali koluka kotia mimesano na bino to mateya ya lingomba na bino, ata ekeseni na Makomi. Na boye, ndenge nini bokoki kokweisa lingomba Katoliko, ntango oyo bozali kosala makambo yango moko bango basalaki? Bososoli? Malamu. Nde, sikawa bókánisa naino, Makomi ekoki kokweya te! Mpo na kobanda, biyambweli ezali lokuta. Pe ntango ondimi ebongiseli, osili kozua biyambweli, mpo ezali eloko oyo babakisi. Ezali kati na Makomi te. Ezali kati na Makomi te.

178 Eloko lokola ebongiseli ezalaka te. Yesu alobaki ata moke te: “Natindi bino ete bókende na mokili mobimba, kosala bibongiseli.” Te, misie, eloko ya boye te! Kosala yango, ezali koboya Makomi mosantu. Ntango likambo yango esalemaki, ebongwanaki longwa na “Lingomba na nzela ya mbotama” na “lingomba na nzela ya biyambweli pe bindimeli”. *Lingomba* te, bolimbisa ngai; efandelo! Babotamaka na Lingomba, kasi bakotaka na efandelo. Ezali lingomba Batiste te, lingomba Metodiste te, lingomba Pantekotiste te. Ezali efandelo Batiste, efandelo Pantekotiste, pe efandelo Metodiste, bakotaka kati na yango. Okoki kokota na Lingomba te. Eloko ya bongo ezalaka te. Babotamaka kati na Yango. Bayebisaki Nikodeme yango. Na bongo, bomoni esika bozali? Oh! la la!

179 Yango wana natelemelaka yango. Natelemelaka bato bazali kati na yango te; natelemelaka mimesano. Mpo bakoki te. . . Soki moko na ba-mpaka yango to eloko mosusu, soki moko na mangomba yango etei likambo oyo ezali kati na Biblia, oyo ekeseni na malakisi wana, mobeko ya lingomba na bango wana, bakobengana ye mbala moko. Iyo, misie. Bamosusu kati na bango bazali na nkanza mingi kino baboyaka ata kotika kolamuka kosalema na lingomba mosusu, libanda na moko na bato na bango moko. Ee, bazalaka mpenza. . .

180 Mokolo moko, moto moko alingaki kopesa na motei moko. . . Awa na ekólo oyo mpenza, mobange motei moko azalaki awa na balabala, koganga pe kobondela bato mpo na kobongola mitema, azalaki koloba: “Bóya, bóyamba Klisto, bótondisama na Molimo Mosantu,” pe makambo ya ndenge wana. Pe moto moko ya ebongiseli Pantekotiste ayaki wana pe apesaki mobali yango dollar moko na maboko, pe asengelaki kokende kobongola motema mpo asalaki ekóbo kotelemela lingomba na ye. Kolobela Ba-katoliko! Ya solo. Bino pe boyebi esika nazali kolobela; to losambo oyo esalaka yango, ata bongo. Malamu.

181 Kosala boye, koboya Makomi, ntango ezali kosalema, boye, ezali kobongwana, ntango obakisi eyambweli pe okoti na ebongiseli, mbala moko, oyambi eyambweli na yo ya liboso, mpo ekokani na Makomi te, na bongo, ezali eloko ya kobakisa. Pe

eyambweli ezali eloko ebakisami, “kozua esika ya”, ezali kozua esika ya mbotama. Ntango oyambi ebongiseli, osili kobakisa eyambweli. Malamu. Ntango yango esalemi, ezali kobongwana mbala moko, kolongwa na “Lingomba na nzela ya mbotama” kokóma “efandelo na nzela ya eyambweli to endimeli”. Mpo, bomoni, ezali na yango moko eyambweli, ekokani na Makomi te.

¹⁸² Sikawa, Yesu alobaki ata moke te: “Bokende na mokili mobimba kosala bibongiseli, bokende kosangisa bato na ebongiseli.” Alobaki: “Bokende kosala bayekoli.” Bondimi yango? [Losambo balobi: “Amen.”—N.D.E.] Amen. Na bongo, bomoni, bozali libanda, na mobimba.

¹⁸³ Boyoka, botala malamau awa. Tósilisa yango na likambo moko to mosusu awa, tófandisa likambo moko malamau mpenza sikawa. Bato boni bazali na dictionnaire ya Greki, Emphatic Diaglott ya makomi ya kala, ya Greki? Malamu. Bótanga yango, bózua moto ya mayele nyonso bolingi. Bókende esika y aba-buku pe bózua dictionnaire, dictionnaire ya Greki. Bótanga Emoniseli 17, pe ntango bokotanga yango, Ndimbola ya Roi Jacques elobi awa, boye: “Amemaki ngai kati na Molimo; pe namonaki mwasi moko afandi likolo na nyama oyo elati elamba ya motane, etondi na—na ba-nkombo ya botúki.” Sikawa, yango nde likambo Roi Jacques alobi. Kasi ndimbola ya ebandeli elobi:

*... amemaki ngai kati na Molimo... pe namonaki
mwasi moko... etondi na ba-nkombo ya kotúka,...*

¹⁸⁴ Bokeseni ezali monene mpenza kati na “ba-nkombo ya botúki” ná “ba-nkombo ya kotúka”. Sikawa, botala malamau. Biso nyonso tososoli pe toyebi ete oyo ezalaki lingomba ya Roma, oyo efandi likolo na ba-ngomba nsambo, ezali kokonza ba-nguya ya mokili. Pe abengamaki “mwasi ya pité”, pe azalaki “mama ya basi ya ndumba”. Bótala! Mwasi ya ndumba ezali nini? Ekoki kozala mobali? Esengeli kozala mwasi. Na bongo, soki ezali mwasi, esengeli kozala lingomba; azalaki mama ya basi ya ndumba, lokola ye moko. Pe bótala, bótala malamau: “Kati na ye!” Tika yango ékota malamau. “Ba-nkombo ya kotúka ezalaki kati na ye.” Ezali nini? Sikawa, batei oyo bazali awa ná baoyo bakoyoka bande, bófanda naino kimia. Ba-nkombo ya kotuka yango ezali nini? Metodiste, Batiste, Presbiterien, Luterien, Pantekotiste, pe bongo na bongo. Ba-nkombo ya kotuka, mpo ezali bibongiseli, kindumba mpo na Nzambe, lokola ye moko mpenza.

¹⁸⁵ Pe bango, na bitóngá yango, bato balobaka: “Ee, azali Metodiste, pe asalaka *boye*. Azali Pantekotiste, pe asalaka *boye*. Azali Presbiterien, pe asalaka *boye*.” Basalaka makambo nyonso kokokana na manáka, boyebi yango. Pe ezali nini? Ezali ba-nkombo oyo esengelaki kozala ya Boklisto pe ébengama na nkombo ya Baklisto, kasi ezali ba-nkombo ya kotúka! Ezali mangomba te. Ezalaka libunga kobenga yango “lingomba”.

Ezali nde bifandelo! Sikawa, bomoni mpo na nini natelemelaka ebongiseli, bato te? Mimesano ya ebongiseli, bomoni, ba-nkombo, ba-nkombo ya kotúka (bótala malamumu) ya bifandelo, ebengamaka na libunga mangomba. Lingomba Metodiste, lingomba Batiste, lingomba Presbiterien, lingomba Pantekotiste, lingomba Luterien, lingomba ya Bandeko ya Lisanga, eloko yango ezalaka te. Ekokani na Makomi te.

¹⁸⁶ Lingomba ezali bobele moko, pe bokótaka kati na Yango te. Bobótamaka kati na Yango. Bobongisamaka liboso mpo na Yango. Nzoto esimbamaka te ya Yesu Klisto . . . ezali nde, Nzoto emonanaka te ya Yesu Klisto awa na mokili, ná Liloba oyo ezali kotalisama. Bana mibali pe bana basi ya Nzambe, bazali kati na moko na yango te. “Bóbima kati na bango,” Alobaki. Iyo.

¹⁸⁷ Botala, nokinoki sikawa. Nalingi kolembisa bino te, kasi soki bokoki kobakisela ngai miníti moke koleka sikawa, nakosala nokinoki mpenza, kasi nalingi ete bókoka mpenza kososola yango, mpo bózanga yango te. Bomoni?

¹⁸⁸ Bóbosana te, mama Roma, kati na ye, ezuamaki ba-nkombo ya kotúka, mama ya basi ya ndumba. Na bongo, soki bazali basi ya ndumba, mwasi ya ndumba azali nini? Mwasi ya pité azali nini? Ndenge moko na mwasi ya ndumba. Ezali mwasi oyo atósaka ndai na ye ya libala te. Pe lingomba nyonso oyo emibengaka Lingomba ya Klisto, pe ezali koangana Liloba na Nzambe, ezali kobuka ndai na yango ya libala! Na bongo, ezali kosala ekobo na kobakisaka biyambweli, kindumba ná mokili pe bwanya na yango, esika ya koyamba Klisto pe nguya ya lisekwa na Ye na nzela ya Molimo Mosantu. Pe azali mama ya basi ya ndumba oyo basili kosala ndenge moko. Nzungu ekoki koloba na mbilíka te ete ezali na “mbindo”, boyebi; bomoni, ezali bobele ndenge moko mpenza. Bato mosusu, mosala na bango bobele kotiola ba-Katoliko, kasi bango moko bazalaka kati na makambo ya ndenge moko. Ye azalaki mama ya libatisi na mai ya lokuta. Ye azali mama ya ndangá ya lokuta ya Molimo Mosantu, bino pe bozali se kolanda ye. Sikawa, tótala.

¹⁸⁹ “Ezali solo, Ndeko Branham?” Bófánda kimia mwa moke.

¹⁹⁰ Bomoni, azali mama ya ba-nkombo ya kotúka, ya bifandelo oyo bato bamikitisaka, pe bazali koyokisa nsoni, kobika ndenge balingi, koláta ba-kupé, basi kokáta suki, kopakola-pakola, koyemba na ba-korále, komela makáya, kolia elámbo, mbindo ya ndenge na ndenge ya mokili, pe ezali libanga ya libaku mpo na mozangi kondima. Timoté alobelaki yango te, Molimo Mosantu? Botala malamumu. Bomoni, ye, Roma azali mama ya bango nyonso wana. Bomoni? Na ebongiseli na bino, bosalaki makambo lokola ye asalaki mpenza, bokotisaki biyambweli esika ya Liloba, mpo etónge ya bato esangisaki yango, bakengeli-bayangeli ya bitúka ná ba-episkopo pe bamosusu na bango balobaki ete esengelaki kozala *boye*, pe yango mpenza nde esalemaki na Roma. Pe soki

omeki, ndeko na ngai mokengeli, koyamba Liloba na Nzambe mobimba, pe, tala esika okokende, libanda na ekuke! Sikawa, tokotala soki Nzambe ayebisaki bino bongo, to te, na ba-miniti moke. Bomoni? Malamu.

¹⁹¹ Bomoni, azali mama na bango nyonso, mpo ye nde abandaki liboso kolongola biteni ya Makomi mpo na kobakisa biyambweli, mpo aboyaki basakoli bapokolami, baoyo bazalaki na bomoi etatolami, ná Liloba. Mpo na mayele na bango, bato ya mayele mingi, bakonzi ya Roma, pe bongo na bongo, baoyo bayambaki Boklisto, kasi balingaki... bayambaki yango na ndenge na bango moko. Bomoni? Ezali solo. Balingaka yango na ndenge na bango moko.

¹⁹² Namáne alingaki kosilisa bokono na ye ya mbálá na mai ya ekólo na ye, asepelaki na mai ya potopoto ya Yaladene te. Kasi soki alingaki kobika na bokono na ye mbálá, asengelaki kokende kuna, kokota na potopoto wana, bobele ndenge mosakoli ayebisaki ye. Bomoni, Nzambe aponaka bilongi ya bato te.

¹⁹³ Botála, ye azalaki ebongiseli ya liboso. Botála bana na ye ya basi, basalaki ndenge moko, babakisaki bindimeli ná biyambweli esika ya Liloba. Bólobela ngai te; bólakisa ngai bobele moko oyo ezali libanda na Yango te. Bólakisa ngai mokengeli moko oyo akoyamba Solo, oyo bakozanga kobengana yo mpo na yango, bobele soki oyebani mingi na lolenge ete, boyebi, basengeli kokangama na yo mpo oyebani mingi to eloko ya ndenge wana. Ezali malamau.

¹⁹⁴ Sikawa bótala na Emoniseli 18, na mwa miníti moke, molongo oyo elandi, mokapo oyo elandi, sima na Emoniseli 17 komonisa pe—pe kotalisa libombami ya Mademoiselle Babilone oyo. Mokapo ya 17 ya Emoniseli elimboli ete ezali lingomba oyo efandi likolo na ba-ngomba nsambo, Engumba ya Vatican, oyo ezali koyangela bakonzi nyonso ya mokili (yango mpenza nde solo), ná bakonzi-ya-mboka lokola, pe bongo na bongo. Ah-hah. Na bongo, kasi azali wana, asimbi bozui ya mokili na ye na loboko na ye. Ezali bongo. “Nani akoki kobunda na ye?” Ezali solo. Bisó nyonso toyebi yango. Kasi mpo na nini osepeli kosangana na eloko oyo ezali koyokana na ye? Sikawa botala na mokapo ya 18, mokapo oyo elandi mpenza, sima na kolimbolama ya libombami na ye. “Afandi na tempelo ya Nzambe.” Sikawa, awa, mokolo mosusu . . .

¹⁹⁵ Zella Braitman, ozali awa na mpokwa oyo, Zella? Amemaki zulunále *Mopaya Na Biso Ya Lomingo*, ya ba-Katoliko, ezali kuna na biro sikawa. Zulunále ya ba-Katoliko yango ezalaki koyanola motei moko. Elobaki: “Olobaki, reverend, ete ba . . . Na chiffre romain kuna na Vatican, to kuna na ngwende ya Pápa, bakomá: ‘Vicariivs Filii Dei,’ oyo elingi koloba, kuna na ndako-ya-nzambe ya Katoliko, ete ezali mo—motángo ya nyama ya Emoniseli?”

¹⁹⁶ “Ee,” alobaki, “ezali mpenza yango. Ezali bongo mpenza, epesi nkama motoba na ntuku motoba na motoba. Ezali bongo mpenza.” Pe ndako-ya-nzambe ya Roma endimi yango, ete ezali bongo. Kasi eyano na bango yango oyo, mayele mingi, etóndá na bwanya, elobaki: “Kasi, oyebi, nkombo na yo na lokota moko boye ekoki pe kopesa eloko yango moko.”

¹⁹⁷ Moto yango alobaki : “Oyo ya ngai, ezali lokola ndenge moko na lokota moko boye.” Asalaki mituya na yango. Alobaki: “Omoni, ya ngai pe epesi pene na nkama motoba na ntuku motoba na motoba.” Alobaki : “Ezali nkama na nkama.” Alobaki : “Ntango nyonso likambo moko esalemaka, moto moko azalaka na nkama motoba na ntuku motoba na motoba.” Pe alobaki : “Reverend, oyebaki ete na lokota moko, nkombo na yo moko ekoki koloba motemeli na Klisto?” Alobaki : “Mpo na nini botalaka makambo ya ndenge wana?” Bótala mayele.

¹⁹⁸ Kasi Molimo Mosantu ayebi yango malamau koleka. Botala. Ekoki kozala bongo, nkombo na ngai ekoki kopesa nkama motoba na ntuku motoba na motoba, kasi nakokisi makambo mosusu etikali te. Ngai nafandaka likolo na ngomba te. Nalobaka makambo *oyo* te. Nazali moyangeli te, bomoni. Ezali solo. Azali kolobela oyo wana. Na bongo, bwanya na bino ya mokili epesaka eloko moko te, misie, ezali solo, Liboso na Molimo Mosantu. Nakokisi nyonso etikali te, kasi ye akokisi yango. “Afandi kati na tempelo ya Nzambe, komitalisa ete azali Nzambe, pe afandi likolo na ba-ngomba nsambo.” Ngai nafandaka likolo na ba-ngomba nsambo te, ata epesi nkama motoba na ntuku motoba na motoba. Nakokisi nyonso etikali te, kasi ye akokisi yango. Bomoni, ezali yango mpenza. Bomoni? Na bongo, bótalela Molimo Mosantu: “Bómitungisa te mpo na likambo bokoloba, mpo bino nde bokoloba te; ekozala Tata.”

¹⁹⁹ Na bongo, ndenge nini bwanya na bino ná Mbotama na bino ya sika longwa na Likolo ekoki kokokanisama na makambo ya mokili oyo awa, ba—bato na solóka makasi oyo bazali na kati? Ee, bayebi makambo nyonso mike-mike. Ndenge nini Mose akokaki koyéka mpiko ntango ye alandaki Mibeko ya Nzambe, abwákaki língenda na ye na nse pe ekómaki nyoka, pe tálá bato na solóka bayaki, pe basalaki ndenge moko? Kasi Mose afandaki kimia, ayebaki ete alandaki Liloba na Nzambe, pe nyoka na ye emelaki baoyo mosusu. Bomoni? Na bongo, ntango osili kotósa pe ko . . . Akokaki kosala nini ntango amemaki bango na mboka ya elaka, pe Mai-na-mbu Motane ekangaki bango nzela, kasi nzela moke ya Nzambe elekaki kati na yango. Amen. Alobaki: “Bófanda kimia, pe bokomona Nkembo na Nzambe!”

²⁰⁰ Ntango ezali na nzela ya lotómo, kolanda Liloba, tikala wana pe okomona yango kofungwama. Amen. Nazali na mibu ntuku mitano na misato, nazali kosalela Ye pene na mibu ntuku misato na misato, ekozala malamau soki nazalaki na mibu milió zomi

mpo kosalela Ye. Naino namoná Ye kokweya ata moke te, ntango Liloba na Ye etósami. Ezali solo.

²⁰¹ Sikawa botala, bobele sima na lisumu na ye, basekelé na ye eyebanaki. Toyekolaki yango eleki ntango molai, toyebi yango.

²⁰² Sikawa mokapo oyo elandi, bóta Emoniseli 18. Nátanga yango naino mwa moke. Ekoki kozala likambo ya malamú, ekozua biso bobele miníti moke koleka, pe ekoki kozala na ntina moke mpo na bino. Nabanzi ezali bongo.

²⁰³ Sikawa, tomoni awa, na mokapo ya 17, molongo ya 5.

*...nkombo moko ekomámáki na elongi na ye,
LIBOMBAMI, BABILONE MONENE, MAMA YA BASI
YA NDUMBA, BOSOTO YA MOKILI.*

Pe bóta.

*Pe namonaki ete mwasi yango (lingomba) alangwe na
makila ya basantu, pe makila ya batatoli ya Yesu: . . .
ntango namonaki ye, nakamwaki mpenza kokamwa.*

²⁰⁴ Bomoni, amonaki ye, azalaki mwasi kitoko mpenza. Pe azalaki mama ya basi ya ndumba, losambo-mwasi ya ndumba, bibongiseli, ndenge moko ye asalaki, bomoni, mpo bakotisaki biyambweli bobele lokola ye. Sikawa botala, botala Emoniseli sikawa, oyo wana ezali mokapo ya 17, esuki na molongo ya 18. Sikawa botala.

*...sima na makambo oyo, wana libombami na ye esili
koyebana, sima na makambo oyo namonaki mwanje
mosusu kokita longwa na likolo, azalaki na nguya
monene; . . .*

²⁰⁵ Sikawa, motindami mosusu ayei, azali kokita, na mokapo oyo elandi, libombami na ye esilaki koyebana. Sikawa, oyo ntango ya koyebana ya libombami na ye pe libombami ya bana na ye. Bomoni, tososoli mpenza sikawa eloko nini ekómisaki ye mwasi ya ndumba: ezali mpo asalaki ekobo kotelemela Liloba na Nzambe. Pe yango nde ekómisaki ye ebongiseli. Akokaki kotikala lingomba ya Biblia te pe kondima yango. Ndenge moko pe na ebongiseli nyonso, oyo endimaka Maloba nyonso na Yango te (ndenge Ekomámá), ekoki kozala lingomba ya Biblia. Pe ata moko na yango te ezali bongo, na oyo ngai nayebi, ata moko te. Na bongo, bomoni, bobele ntango akómi ebongiseli, likambo azali kosala, (na nzela ya Makomi pe na nzela ya ndangá) akufi mbala moko wana, ntango ayambi eyambweli. Sikawa botala, sikawa yango nde esalemaki.

²⁰⁶ Na mokapo ya 18 oyo, Nzambe atindaki mwanje na nguya, sima na libombami wana koyebana, mwanje na nguya, to, motindami. Botala malamú awa.

*...sima na makambo oyo namonaki mwanje mosusu
kokita longwa na likolo, ná nguya monene; pe mokili
engengaki na nkembo na ye.*

Pe agangaki...na mongongo makasi,...Babilone (mobúlu) monene ezali kokweya,...pe esili kokóma efandelo na milimo mabe,...boloko ya milimo na mbindo nyonso, pe boloko ya bandeke nyonso ya peto pe ya koyina...ya mbindo, pe oyo eyinami.

Mpo mabota nyonso esili komela vinyo ya nkanda ya pité na ye, pe bakonzi ya mokili...basali na ye pité, pe bato na mombongo na mokili bazui mosolo mingi mpo na koyikana na mosolo na ye.

207 Botala, bobele sima na libombami na ye koyebana, nani ye azalaki, nini ye azalaki, ba-nani bazalaki bana na ye ya basi, sima na libombami yango koyebana, sima na yango, Nzambe atindaki mwanje, motindami mpo na (nini?) kobimisa. “Bóbima!” Nsango ya eleko oyo!

...Bóbima kati na ye, bato na ngai, ete bósangana na malozi na ye te...

Alingi kolakela ye mabe. Botala malamau.

208 Bóbima kati na ye! Nzambe atindaki mingi...mwanje na nguya, to, motindami. Pe Pole na ye ezalaki na litúmu moko te, Epalanganaki na mokili mobimba. Bóbima kati na ye! Nini? Ye, ná bandeko na ye ya basi pe. Mpo na kongengisa mokili, pe kobenga bato na Ye kobima kati na ye. Sikawa, boyebi ete ezali Solo. Motindami moko atindamaki longwa na Likolo, mpo na kobenga bato na Nzambe kobima na Babilone. Pe Pole na ye engengisaki mokili, Molimo Mosantu ya nkembo.

209 Botala, Biblia elobi: “Azali boloko, pe akangaki ba-ndeke oyo eyinami, ya mbindo.” Ba-mpongo te, sikawa, te, te, te. Ba-kombekombe, “bandeke ya mbindo, oyo eyinami”, bango nde akangi na boloko na ye. Azali boloko oyo etondi na bango, boloko mobimba etondi. Na nini? Na “ba-nkombo ya kotúka”, oyo ekeseni na Makomi. Timote ya Mibale mokapo ya 3 elobi, Molimo Mosantu nde azali koloba: “Na ntango na suka bakopengwa longwa na Kondima mpo na kobila milimo na kozimbisa.” Elobi lisusu, Molimo Mosantu nde alobaki ete “Na ntango na suka bakokóma motó makasi, bato bavimbi na lolendo, bayini (‘Nzambe ákumisama, ozali moto na biso, to nkombo na yo ekomami na buku na biso te, osili kobunga’). Bayinami! Bato na mbindo!” Nakanisi ete nazali koyokisa bato mpasi te, nakanisi ete nazali kosala bolamu. Bandeke eyinami, ya mbindo, ye nde akangi bango.

210 Bobosana te, Nzambe azali mpongo. Amibengi mpongo. Pe Abengaki Yakobo mpongo. Pe biso tozali bana-mpongo na Ye. Amen. Abengaki basakoli na Ye “ba-mpongo”. Pe mwanje oyo akitaki mpo na kotalisa polele pe kobimisa!

211 Lokola mwa liteya na ngai ya *Mpongo Atongaka Zala Na Ye*. Mwana mpongo wana azalaki ntango nyonso kolanda mama soso wana kati na lopango ya ba-soso, bazalaki kosala kot-kot,

kasi ye azalaki kokoka kolia bilei wana ya mama soso te, ya kosepelisa bato, basi bapakólá-pakólá na bilongi, bakátá suki, pe balátá ba-kupé. Ye akokaki kosala yango te. Kasi ayebaki eloko mosusu te bobele kot-kot ya mama soso wana. Kasi mokolo moko mama mpongo amonaki ye. Abelelaki, abengaki ye ete ábima, alobaki: “Mwana, yo ozali moko na bango te. Bimá libanda na ye!”

Alobaki: “Mama, násala nini?”

²¹² Alobaki: “Beta mapapu pe pumbwá.” Kopumbwa ya liboso, asukaki likolo na likonzi moko, kati-kati na ebongiseli moko. Alobaki: “Mwana, osengeli komata likolo koleka, soki te, nakokoka kozua yo te. Osengeli kolongola makolo na yo na mabelé.” Akomema ye na mipepe. Asosolaki ete akokaki kopumbwa. Ayaki kobenga ye ete ábima. Ezali solo.

²¹³ Kasi Mama Babilone oyo akangaki ba-soso mingi na boloko, bana basi ya mikolo oyo, bapakólá-pakólá, bakátá suki, bamibengaka “Baklisto”. Boloko na ye etondi na bango. Bino batei oyo bozalaka na eteyelo pe botikaka basi yango kokóba kosala bisalela mpo ebongiseli na bino efúluka na bato, nsoni na bino. Nzambe akosenga yango na maboko na bino. Bóbima na yango! “Ba-mpate na Ngai bayokaka Mongongo na Ngai.” Boloko ya bayini, bato ya motó makasi, bavimbá na lolendo, balingaka bisengo koleka bolingo na Nzambe, basepelaka kozala lokola mokili esika ya kozala lokola Klisto. Soki bomoni mwasi oyo apakoli-pakoli na elongi na ye, ezali kotalisa ete azali mpamba kati na ye. Azali mabe na kati. Ezali mpenza yango. Soki mwasi . . . Namonaki moko mokolo mosusu, azalaki ná suki ya mai-ya-pondu, ya solo, ná bikela-kela ya langi ya mai-ya-pondu oyo batiaka na miso na bango.

²¹⁴ Sikawa, soki o—soki—soki ozalaki na suki te, pe—pe olingaki kolata yango, ezali mabe te, kasi, láta oyo ezali kokokana na bato. Pe soki ozalaki na manzáka te, pe—pe olingaki kozala na manzáka, kozua te oyo ezali lokola mposu ya madesu ya pembe, zua—zua manzáka oyo ya solo. Soki ozangi moko na biloko yango, ezali mabe te. Soki ozali na mino te, luka kozua yango soki bakoki kosalela yo yango, zua yango. Kasi kopikola mino oyo Nzambe apésá yo te mpo eténgámá mwa moke, kasi ezali mino malamumu, mpo na kozua mino mosusu. Kotia lángi na suki na yo te, to eloko moko, mpo na kokóma lokola eloko moko oyo euti esika moko na potopóto. Te. . . Soki ozangi lángi, pe olingi komonana lokola ozali na lángi, ezali mabe te, nakanisi. Kasi komikómisa lokola Yezabele te, lokola ndako moko boye ya bibwele epakolami lángi.

²¹⁵ Pe bino bandeko ba-Pantekotiste, baoyo bopesaka basi oyo nzela ya kokata suki na bango, ntango oyo Biblia elobi ete yango ezali nkembo na bango! Pe ezali ata malamumu te mpo na mwasi kobondela ná suki na ye ndenge wana. Ata bongo, bopesi ye

nzela ya komata na etumbelo mpo na koteya Nsango-malamu, koyemba na korále, koteya na eteyelo ya lomingo. Nsoni na bino! Bosengelaki komiyoka nsoni. Mpo na nini natelemelaka bibongiseli? Bokanisi ete ngai nakoki kosepela na eloko ya ndenge wana? Nayebi ntina nini bozali kosala yango, ndeko. Boyebi yango malamau koleka, kasi soki botei kotelemela yango, bakofunda bino na quartier general, pe bakobengana bino. Nzambe ápambolama mpo na mpiko na bino soki bokosala yango. Ezali solo. Nzambe akomemia bino.

²¹⁶ Mwanje yango alobaki nini? “Bóbima kati na ye!” Iyo, misie. Mwanje yango ayaki na mokili, ayaki kopesa Pole, pe angengisaki mokili mobimba na Pole. Azalaki mwanje na nguya. Pe ayaki mpo na kosakola Nsango ya “Bóbima na Babilone! Bómama biloko na ye ya mbindo te!”

²¹⁷ Atondisi bango na boloko na ye, elobaki: “Azali boloko ya ba-ndeke nyonso eyinama.” Iyo, atondisi bango na boloko na ye sikawa, Likita ya Mangomba ya Mokili, to bifandelo. Atondisi bango na boloko na ye sikawa, bango nyonso bazali kosangana. Akómi boloko, ya solo, etondi na ba-ndeke eyinama. Ezali solo. Meká kosolola na moko na bango mbala moko, meká yango naino, oh, bazali mayele mingi na bwanya ya mokili, kasi bayebi Nzambe ata moke te, ndenge lapin ayebi sapato ya neige te. Ezali solo. Ezali bongo mpenza, bomoni, nyonso bayebi ezali mwa mayele bakoki kobakisa kikambo *oyo* pe kosala likambo *oyo kuna* na kati. Kasi soki ekómi likambo ya koyeba Ye? Hum! Iyo, bakangámá na boloko na ye ná biyambweli na ye. Mangomba ya ba-protestant babandi kosala ndenge moko, bakómi bana na ye ya basi, bakomaki yango na koangana Liloba na Nzambe. Yango nde asalaka. Awanganaka Liloba. Pe ntango oyambi eloko mosusu esika ya Liloba, yo moko pe owangani Yango. Pe ntango osangani na moko na yango, yo pe osili kowangana Liloba. Nzambe alingi te ete ózala bongo, esika na yango ezali te na Makomi.

²¹⁸ Botala, oyo nde mwanje ya Pole, bobosana te, mwanje ya suka, ezali mwanje ya eleko ya lingomba ya Laodikia. Ezali motindami ya Laodikia, nde, azali ya suka, mpo mokapo mpenza oyo elandi ezali mokapo ya 19, oyo ezali boyei ya Mwasi na libala. Pe, na Makomi, oyo ezali mwanje ya suka, oyo ayaki kopesa Pole liboso na boyei ya Mwasi na libala kokende kokutana na Klisto. Ezalaki nde Eleko ya Lingomba ya Laodikia. Motindami na Eleko ya Lingomba ya Laodikia ezalaki nini? Kobenga bango kobima na Babilone! Botala! Mangomba ekangami na boloko na ye elongo na ye, ná biyambweli na ye, ezali kowangana Liloba pe koyamba biyambweli. Oyo nde mwanje ya Pole mpo na lingomba ya Laodikia oyo esili koboya Klisto pe Liloba na Ye, mpo na biyambweli, pe ebimisaki Ye libanda. Pe Atelemi na ekuke, azali kobeta, koluka kokota. [Ndeko Branham abeti eteyelo—N.D.E.] Bomoni? Eleko ya lingomba esili koboya Klisto,

pe Klisto azali Liloba, pe esilaki koboya Yango, pe Azalaki libanda. Tozali na eleko ya lingomba se moko, oyo Klisto azali libanda, Azali kobeta, koluka kokota. [Ndeko Branham abeti eteyelo.] Pe Nsango ya mwanje yango, motindami oyo auti na Nzambe, ezalaki koyokisa Nsango na ye na mokili mobimba, ete “Bóbima na Babilone! Bóbima na bibongiseli!” Molimo Mosantu lelo, komonisama ya Molimo Mosantu ezali mwanje oyo azali koluka kozongisa bato na Liloba, mpo Molimo Mosantu akotatola bobele Liloba. Akoki kotatola biyambweli te, bomoi ezali kati na yango te. Ye azali Bomoi. Botala, Eleko ya Lingomba ya Laodikia esili kotika Ye, koboya Ye, pe batiaki Ye libanda.

²¹⁹ Botala, mwanje oyo azali motindami ya suka, liboso ya boyei ya Klisto, na mokapo ya 19 ya Emoniseli. Mongongo ya motindami! Soki totali malamumu, ntango ayokisaki Mongongo na ye na mokili, Mongongo mosusu eyokanaki na Likolo. Molongo ya 4, soki bolingi kotánga yango. Malamumu, molongo ya 4, mokapo ya 19. Motindami oyo, na mokili, amipesaki mingi na Nzambe kino, ntango asakolaki yango na mokili, Nzambe ayokisaki likambo yango moko longwa Likolo. Ndimbola ya molongo yango ya 4 ezali nini? Elingi koloba nini? Mongongo ya Nzambe ezali koloba na bato na Ye babongisámá liboso, ete: “Bóbima kati na ye!” Ezali mpenza ndenge Mongongo yango elobaki! Azali na bato bisika nyonso kuna, na Babilone mobimba. “Bóbima kati na ye, pe bósangana na masumu na ye te,” iyo, misie, kobima na biyambweli pe bindimeli wana, kokota na Liloba oyo ekómi Molimo pe Bomoi. Amen.

²²⁰ Bótala, mokapo ya 19 ezali oyo elandi: “Sima na makambo oyo.” Bomoni awa na mokapo ya 19: “Sima na makambo oyo?” Bótala likambo nini? Sima na nini? Sima na Nsango ya “Bóbima kati na ye!” “Sima na makambo oyo,” bótala, “ezali kogánga ya basantu ya Mwasi na libala, elongo na Mobali na libala, bazali kokende na Libala ya Mwana-Mpate.” Na boye, tokómi mpenza pene na yango, ndeko, boye te? Mbéla ya suka ezali nini? Bóbima na Babilone!

²²¹ Sikawa, bandeko na ngai, yango nde ntina natelemelaka yango. Ezali libanda na Makomi. Ezali mpenza na molongo te. Etalisámá polele ete ezali lokuta. Nzambe azali kati te, Azalá naino te, Akozala pe mokolo moko te. Sikawa, nalobi te ete ezangi bato kati na bibongiseli yango te, lingomba esalemaki baoyo bauti nde kuna. Kasi, ntango nyonso bozali koumela kati na momesano yango, bozali eteni na yango.

²²² Soki nazali kofanda na Etats-Unis, nazali mo-Amerika. Ntango nyonso oyo nazali mwana-mboka to moi-mboka ya Etats-Unis oyo, nazali eteni na yango. Soki nakei na Allemagne pe nawangani ki-mwana-mboka na ngai, to ki-moi-mboka na ngai, nakómi na ngai mwana-mboka ya Allemagne, nazali lisusu mo-Amerika te, nazali Allemand. Pe soki nakei na Japon, to esika mosusu nini, na Russie, nakómi mwana mboka ya kuna.

223 Pe ntango osangani na mwana mboka...na momesano moko, pe okómi mwana-mboka ya momesano yango, ozali kotalisa nani yo ozali. Pe na ntango oyo ya suka, Nzambe azali kobenga bato kobima na yango. Biblia elobi bongo: “Bóbima kati na ye, mpo na kosangana na ye te, pe Nakoyamba bino. Bómama biloko na ye ya mbindo te, bomoni, pe Nakoyamba bino. Bokozala bana na Ngai ya mibali pe ya basi, pe Ngai nakozala Nzambe mpo na bino.” Bomoni?

224 Yango wana nalobaka kotelemela lingomba, e—fandelo. Nakoki kobenga yango lingomba te. Lingomba ezali bobele moko, ezali Lingomba ya Nzoto na Klisto. Kasi bifandelo oyo babengaka “lingomba”, Biblia na ngai eyebisi ngai ete ezali ba-nkombo ya kotúka, yango nyonso, bibongiseli nyonso. Bazali kotúka nini? *Kotúka* ezali “kozala na bokesene na”, to, “kotelemela”. Ntango Nzambe alobi “Boya kobotama”, bango balobi “Boya kosangana”. Bomoni? Ntango libatizi ya Molimo ebongolami mabe na lípa ya komúnio na lingomba Katoliko, mbote ya loboko na lingomba Protestant, pe kotúntuka na lingomba Pantekotiste, esika ya Bomoto ya Klisto koya na kati, ná biteni nyonso etongaka piramíde, oyo toyekolaki mokolo mosusu.

225 Kobakisa na kondima na yo, nguya, pe bongo na bongo, nyonso wana, na Petelo ya Liboso, mokapo ya 1...Petelo ya Mibale, nakanisi, mokapo ya 1, esika nyonso wana ebakisami likolo na kondima na yo, makambo nyonso oyo: bo-nzambe, bopeto, bosantu, pe nyonso wana, na sima, otiami elembo na Molimo Mosantu.

226 Kasi ezali lokola moto moko oyo ba...bato balobaka ete bazali na yango, ntango oyo bazali na yango te, mpo balakisamaki mabe. Ba-Methodiste bazaláká na eloko moko ya ndenge, pe koningana mwa moke, to—to kobina na Molimo. Ba-Pantekotiste balobaka minoko na sika, to—to basalaka eloko moko ya koningisa nzoto. Nandimaka makambo wana, na ntembe te, kasi makambo yango, kozanga oyo mosusu, ezali na ntina moko te.

227 Ndenge nalobaki mokolo mosusu, ezali lokola ndeke oyo paon...to ndeke ya moindo oyo merle azali koluka kokotisa nsala ya paon na nzoto na ye, to nzéngó azali koluka kolata nsala ya ebenga. Ebótá naino na nzoto na ye te, akotisaki yango ye moko. Balóni yango, bazali ebongiseli. Kasi ntango Nzambe akotisaki eloko moko na kati, ezali ya kobotama. Omisali yo moko pe olobi: “Nakotaki na lingomba lobi na mpokwa. Nakokende lisusu te, nakomela lisusu masanga te, nakosala lisusu *boye* te. Nasili kokota na lingomba.” Omoni, ozali koluka kokotisa nsala ya ndeke oyo paon na nzoto na yo ya nzéngó. Ezali solo. Bomoni? Bomoni? Osengeli kobotama mbala mibale! Osengeli koyamba Klisto. Pe ntango oyambi Klisto, okoki koyamba Klisto te kozanga koyamba Liloba na Ye, mpo Azali Liloba. Pe ntango

ozali na lolenge ya kosambela, pe owangani Yango, na boye nakokamwa. Bomoni? Okoki kokoba kozala moto ya bibongiseli nyonso olingi pe kozala na lolenge ya kosambela, kasi ata bongo, ozali na Yango te.

²²⁸ Sikawa, ezali yango mpenza, baninga. Mama na likambo yango wana. Nzambe ápambola bino. Nzambe ásungu bino. Nalobi boye te mpo na kozala na bokesene. Nazali kotalisa makanisi na ngai. Lelo ezali feti ya kokundola suka ya etumba, nazali kotia mokólótó ya boyokani ya kimia elongo na bino batei te, ata moke te, nabanzi bosengeli koya kotia mokólótó elongo na ngai; elongo na ngai te, kasi elongo na Nzambe, Liloba. Ezali solo. Bólobaka makambo Biblia elobi, bólobaka Yango ndenge Elobi Yango. Mpo Biblia elobi: “Moto oyo akolongola to akobakisa na yango moko.” Bomoni, ebongiseli ezali libanda na Makomi, pe ntango oyambi eyambweli ya liboso, ntango mosusu osili kozonga na yo sima mpenza, mpo okatisi ndelo mbala moko. Ntango ozongi na mbótama ya sika, nde okotambola kati na Makomi.

²²⁹ Pe ntango okei kati na ebongiseli, balobaka: “Nayebi, biso tondimaka *Yango* te. Na lingomba na biso, ba-episkopo na biso bateyaka ete tozali moko na mangomba ya kala koleka. Toteyaka te...” Oyo bango bateyaka te etali ngai te. Soki Biblia etei yango, Molimo Mosantu kati na yo, Ekolia nde Liloba. Ata moto azali mayele ndenge nini pe ndenge nini akoki komeka kondimisa yo ndenge mosusu, bakokoka kondimisa yo te. Mozangi kondima akoki kozua Biblia pe kondimisa yo kokesene na oyo Nzambe alobi.

²³⁰ Yango wana moto moko te azali na makoki ya koteya Nsango-malamu soki naino akei mosika te, lokola Mose, na mabélé ya bulee, esika bobele ye ná Nzambe bazalaki, kino moto abotami mbala mibale kuna miso na miso na Nzambe, pe ayebi yango. Mozangi kondima ata moko te, psychologie ata moko te, ndimbola ata moko te, moto ya mayele ata moko te na mokili akoki kolongola Yango na yo. Ozalaki wana ntango esalemaki! Iyo, misie. Oyebi likambo oyo esalemaki.

²³¹ Na sima, bolobaka: “Nabikelaki likambo yango, pe nazali na molimo moko likolo na ngai.” Kasi soki ewangani Liloba na lolenge moko to mosusu, ozali na molimo mabe. Olobi: “Na—nakoki kondima likambo ya Boye te. Nayebi, kasi lingomba na biso. . .” Ah-ah, ezali na molimo mabe. Yango nde elembo ya kotalisa yo. Kaina, osili kotiámá elembo. Iyo, misie.

²³² Eva atiaki ntembe na Liloba se moko ya moke; nyonso Nzambe alobaki te, Liloba se moko ya moke, kasi ememáki bokono ya motema nyonso, mpasi na motema, kufa, lisumu, bitumba, pe nyonso mosusu, nkunda nyonso, ambulance nyonso oyo ebetaka ntángwá, lopitalo nyonso oyo etongámá mpo na babéli. Mwa ntembe moke na ye na mwa Liloba na Nzambe se

moko ya moke, nde ebotaki makambo nyonso oyo. Pe atiamaki libanda, mpo likambo yango esengelaki na yango kosalema te. Yo okokota ndenge nini, wana ozali kotia ntembe na Liloba na Yango moko? Okoloba: “Nayebi ete Elobi *Bongo* kasi Yango. . .” Elingi mpenza koloba Bongo!

²³³ Sikawa botala. Nzambe asengeli kosambisa mokili na eloko moko. Okoki kosambisama te soki ozui naini mobeko te liboso. Eloko moko esengeli kozala, osengeli kobuka mobeko mpo ósambisama. Bomoni? Na sima, kosambisama ekoki kosalema malamau te soki etúmbu ezali te. Sikawa, bomoni, bokoki kozala na mobeko te na engumba, oyo elobi “lománde ya dollar mitano soki okatisi moto ya motane,” pe mobeko ya sima elobi “te, akoki kokende na bonsomi.” Bomoni, bokoki kosala bongo te. Na bongo, mibeko mibale ekoki kozala kosala mbala moko te. Pe mobeko ezali se moko, Nzambe moko, Buku moko, Klisto moko. Esili. Kondima moko, elikia moko. Esili. Ezali Biblia, Klisto.

²³⁴ Botala sikawa, na likambo oyo, soki eloko moko esengeli kobakisama na Yango, esengeli kobakisama na moto. Ekoki kozala ndenge mosusu te bobele. . .

²³⁵ Pe soki Nzambe akosambisa mokili na lingomba moko, ndenge ba-Katoliko balobaka, na bongo Akosambisa yango na lingomba Katoliko oyo wapi? Bazali mingi; moko ezali ya Roma; mosusu ya Greki; pe, oh, ezali ya ndenge na ndenge. Akosambisa yango na lingomba Katoliko nini? To, ntango mosusu Akosambisa yango na ba-Luterien? Ee, na boye, ntango mosusu Akosambisa yango na ba-Presbiterien? Bomoni? Akosala nini? Akosambisa yango na lingomba moko te. Akosambisa yango na Liloba na Ye. Ee, na boye, Ye. . .

²³⁶ Bomoni, Akoki kozua etonga moko ya bato te, lokola emononeli ya ndeko mwasi mokolo wana na mpokwa, Molimo Mosantu ekitaki, Elekanaki esika wana. Na ntembe te, eloko moko te ekangaka Yango. Ezali moto moko. Epesámá mpo na kopetola lingomba, kasi eloko te ekoki kokanga Yango. Ebongiseli ata moko te ekoki kokanga Yango. Esili. Ekokoka te. Ozali na nyonso kati na yango, pe okokoka kosala yango te. Ebongiseli ekokoka kosala yango te. Kasi ezali moto oyo azali na Molimo Mosantu. Sikawa botala.

²³⁷ Na boye, soki Nzambe akosambisa mokili na Liloba na Ye, na boye, Asézelaka mpenza likolo na Yango pe Abatelaka Yango malamau. To, soki Ekoti mpenza na mobúlu, Akomema kosambisa ndenge nini? Bomoni? Eloko moko esengeli kozala. Pe Alobaki ata moke te: “Moto nyonso, na nzela ya lingomba.” Alobaki: “Moto nyonso oyo akolongola Liloba moko na Yango, to akobakisa liloba moko na Yango, akololongolama ndenge moko (eteni na ye) na Buku na Bomoi.” Na bongo, mpo na ngai, ezali Nzambe, Liloba na Ye ná kosambisama. Sikawa, soki nakati ntina pe nandimi Liloba, pe namoni ete Klisto akufaki mpo na

ngai, na boye nakosenga Bomoi na Ye kokota na kati pe kokamba ngai. Pe soki Bomoi na Ye ezali Liloba, pe Ye moto akomaki Liloba, ndenge nini Bomoi na Ye ekoki kozala kati na ngai, pe ngai nalobi ete nazali na Molimo Mosantu, pe nazali kobakisa eyambweli esika ya Liloba? Ekosimba ata moke te. Ndenge nini nakoki kobakisa ebongiseli ntango Ye azali kotelemela yango, pe natalisi yango polele, pe nalakisi yango na mambi-ya-kala nyonso, ete ntango nyonso bato basálaka ebongiseli bakufaka, kati na molimo? Oh, na ntembe te, bakómaka na bandimi mingi. Ezali solo. Bakómaka na bandimi mingi. Kasi, kati na molimo, bakendeke ata esika moko te. Bólakisa ngai, bóyebisa ngai na mambi-ya-kala, esika moko oyo lingomba moko. . . Sima na yango kokóma ebongiseli, ekufaki mbala moko, Molimo Mosantu atikaki yango. Bikamwa pe bilembo ezalaki lisusu te, pe ekotaki mbala moko na yikiyiki.

²³⁸ Yango wana mpenza nde ekómelaki mangomba na biso ya ba-Pantekotiste. Basalaki mpenza makambo oyo mama na bango asalaki. Na ebandeli, ntango babimaki, bazalaki bato oyo baboyaki bibongiseli. Sikawa, bamosusu na bino bandeko oyo bozali koyoka bande oyo, bamosusu na bino bato ya kala, boyebi ete mibu eleki, eleki mibu ntuku minei to ntuku mitano, soki bayebisaki bino likambo ya ebongiseli, bozalaki koloba ete ezali kotúka. Kasi lelo bokómi kati na eloko oyo bokanisaki ete ezalaki kotúka. Bino basi oyo bozali kokata suki na bino pe kopakolaka-pakolaka na bilongi na bino, mama na bino atelemelaki yango, mobange mosantu malamú—malamu wana ya Pantekotiste. Likambo nini ekómeli bino? Polo alobaki: “Bopotaki mbangu malamú, eloko nini epekisi bino?” Bomoni? Kalakala bozalaki nsomi mpo na kosala makambo wana te, kasi bolingaki kozala lokola bamosusu na bango.

²³⁹ Ezali mpenza likambo Samuele alobaki. Yisalaele ezalaki na Mokonzi moko, ezalaki Nzambe. Pe balobaki: “Samuele, obandi kokóma mobange. Pesa biso mokonzi, tolingi kozala lokola bamosusu na mokili. Tolingi kozala lokola bikólo mosusu. Tolingi mokonzi oyo akokambaka biso na bitumba, tolingi mokonzi oyo akoki kobunda bitumba na biso.” Pe likambo yango esepelisaki Samuele te.”

²⁴⁰ Alobaki: “Nasílá kozua eloko na bino moko? Nasílá kozua mbongo na bino? Nasílá kosenga bino ngombe to eloko mosusu? Nasílá kosenga bino eloko moko?”

Balobaki: “Te. Oséngá biso naino eloko moko te.”

²⁴¹ To alobi: “Nasílá koyebisa bino likambo na Nkombo na Yawe pe ekokisámá te?” Ezali solo? Alobaki: “Na boye, bóyamba mokonzi yango te, mpo ekomemela bino yikiyiki.”

²⁴² Sikawa nalingi kotuna bino likambo moko, Branham Tabernacle. Etikali moke bokokóma mongombo monene sikawa. Ntango mosusu nakozala mosika mpo na ntango moke. Nakoki

kokende esika moko. Ezali mpasi koloba esika Nkolo akobenga ngai; ntango mosusu nakolongolama na mosala, ntango mosusu nakozonga na elanga, ntango mosusu Akoki kobenga ngai kokende na biliki. Nayebi te esika Akobenga ngai kino Yesu akoyá. Nalingi kotuna bino likambo moko. Nasílá kosenga bino eloko moko? [Losambo balobi: “Te.”—N.D.E.] Nasílá kosengasenga bino mbongo? [“Te.”] Nasílá koyebisa bino likambo moko, na makambo nkóto na nkóto oyo nasílá koyebisa bino na Nkombo na Nkolo, bongo ekokisamá te? [“Amen.”] Na boye, bókota na ebongiseli ata mokolo moko te. Ezali kotelemela Liloba na Nzambe. Bóbima na yango soki bozali kati na yango, bókabwana na yango pe bóyamba Liloba na Nkolo.

Tógumba mitó na biso.

²⁴³ Nzambe monene ya basakoli, Nzambe ya Abalayama, Isaka, pe ya Yisalaele, bakisá nguya, Nkolo, likolo na Liteya moke oyo ya biteni-biteni, oyo ezalaki ntango molai na motema na ngai, mpo na kopesama na bandeko ngai. Mingi na bato ya libanda, Nkolo, bazalaka na makanisi ya malamau te mpo na ngai. Bakanisaka ete ngai nalingaka kokesene na bato. Bakanisaka ete ngai nalukaka kozala moto-oyo-ayebi-nyonso. Bayebisaka bato ete ngai napéngwisaka bato, koleka mingi na malakisi lokola *libatisi na mai* na Nkombo na Nkolo Yesu, *momboto na nyoka*, *mwasi ya nduma monene*, pe ba-bande mingi oyo esílá kobima, ná eloko mosusu te, bobele Solo ya péto. Pe natunaki bango: “Bamosusu kati na bino báyá kolakisa ngai esika nasali lisumu, to nazangi kondima to nalimboli Liloba mabe.” Pe ata moto moko te amonanaki. Nabondeli Yo, Tata, tika ete bato yango báyebe ete bazali kozanga litómba ya eleko oyo. Bakozela kino ntango ekeleka mpenza, soki bakebi te. Tika ete moko na moko na bango . . .

²⁴⁴ Nkolo, nandimisami na likambo oyo, motema na ngai ekoki kosuka soki Makomi oyo ezalaki solo te mpo na ngai, ntango Olobaki: “Baoyo nyonso Tata apésá Ngai, bakoya. Ba-mpate na Ngai bayokaka Mongongo na Ngai.” Na bongo, Nkolo, nabanzi ete Bokonzi ezali mpenza ndenge Olobaki, nayebi ezali bongo, ezali lokola moto oyo azuaki monyama pe akendeki na láki, abwakaki monyama, abendaki biloko ndenge na ndenge. Na ntembe te, ezalaki na ba-mbisi ya motuya, ezalaki na ba-nkóba, mámpulútútú ya mai, ba-nyoka, biloko nyonso oyo monyama ya Nsango-malamau ekangaki. Kasi na suka, nokinoki, kosakósa ezongaki na mai, nkoba emibendaki, nyoka ebétaki piólóló pe ezongaki na libulu ya potopóto, lokola mbwa na bisánza na yango to ngulu na potopóto na yango. Kasi mbisi ya solo pe ezalaki wana, Nkolo. Pe nazali na kobóndisama oyo, ya koyeba ete ata liboso monyama ékita likolo na bango, bazáláki ba-mbisi, na ntango wana. Babótámá, ba-mbisi ebongisámá liboso. Ezali pe bongo mpo na monyama ya Nsango-malamau oyo ekangaka bato na mayangani ya kolamuka. Yo oyebi Baoyo ya Yo. Eloko se

moko nazali na mokumba na yango, Tata, na boyebi na ngai, ezali kotikala sembo na Liloba oyo. Yo moto Okánaka eloko nini ezali eloko nini. Pe nayebi ete lokola nkóba ekoki kokóma mbisi ya truite te, ndenge moko pe mobali to moto, oyo akúfá matoi mpo na Nsango-malamu, akoki mpenza kosósola Solo te. Mpo Tata asilá komóna yango liboso, pe Olakaki ete baoyo nyonso Apesá Yo bakoya.

²⁴⁵ Tata na Likolo, nabondeli Yo ete moto nyonso oyo ayoki Liteya moke oyo, ete Pole oyo eteyamaki na yango, pe lisosoli oyo nazali na yango na motema na ngai mpo na bazalani na ngai, bato oyo Yo okufelaki. Pe bato, bamosusu na bango kuna, Nkolo, lokola etóna ya Kora, bato malamumu, bakambami mabe, ná mpaka-malasi ya bulee na maboko na bango, kasi bakufaki. Ee, batikaki ata mpaka-malasi ya móto yango kokóta kuna elongo na bango te; mwana ya Aalona, Eleazar, nde asengelaki kosangisa yango. Pe, basalaki bendéle mpo na etumbelo na ba-mbilika wana, nguba, mpo na kotalisa, pe kozala ekaniseli ya likambo ya nsómo wana, ete Kora alukaki kosala ntèkè ya ebongiseli mpo na kotelemela motindami ya Nzambe. Likambo oyo ézala mosika na biso, Nkolo. Tika ete Molimo Mosantu ábatela biso ntango nyonso.

²⁴⁶ Totondi Yo, Nkolo, mpo na lingomba na biso ya moke, esika moke ya bulee oyo. Eleki mibu mingi, koleka mibu ntuku misato, nafúkamaki na kati ya etíma oyo awa, etóndá na matíti pe mabelé ya mai-mai, pe tobulisaki eteni ya mabelé oyo epai na Yo, ndako moke oyo. Pe kuna na litúmu ya mongombo oyo, emononeli yango ezali wana. Ekokisami mpenza. Ezali naino wana. Bakobuka yango te, Nkolo, bobele, bako. . . ebandi konuna, pe bakobátela bobele yango na kobakisa eloko moko likolo na yango. E Nzambe, sálá ete Nsango-malamumu ya wólo oyo ekomami na nkasa oyo, tika ete Élongwa na losambo moke oyo te kino Klisto akoyá. Tika ete mondimi nyonso, mondimi nyonso ya Nzoto na Klisto, baoyo bayáka awa kouta na ekóló pe mokili mobimba, tika ete moko na moko na bango áyamba Pole, Nsango-malamumu, na sima, átambola kati na Yango pe áyamba Klisto.

²⁴⁷ Pe tika ete ézala mpenza solo na lolenge ete Maloba na Ye ekokokisama: “Misala mizali Ngai kosala, bango pe bakosala yango. Ye oyo akoyoka Maloba na Ngai, pe akondima Ye oyo atindaki Ngai, azali na Bomoi na Seko.” Pe ntango Bomoi na Seko ekoti, babotami na Likolo, pe misala longwa na Nzambe ekomitalisa, mpo ezali Bomoi yango moko oyo ezalaki kati na Ye. Ekoki kosala eloko mosusu te.

²⁴⁸ Na bongo, Tata, tika ete losambo oyo ételemisa Seko-na-seko na yango te likolo na kotúntuka, likolo na ebongiseli, likolo na eloko mosusu te libanda na Klisto Ye moko kobika kati na bango, kotatola Liloba na Ye na nzela na bango pe bilaka na Ye. Tika ete, kobanda mwana ya moke koleka oyo azali awa na

mpokwa oyo, kino mokóló koleka, bábikela likambo oyo. Pe tika ete mobali to mwasi nyonso, mwana mobali to mwana mwasi, oyo ayoki bande oyo, tika ete ésalema pe bongo na bango, Nkolo, pe pesa bango lisosoli ete nazali bobele koluka kokebisa pe kobenga bato kobima, mpo ntango ekómi mosika koleka ndenge tozali kokanisa.

²⁴⁹ Pe tozali komona Babilone, mama mwasi ndumba, ná bana basi na ye nyonso ya ndumba, bazali kosangana. E Nzambe, tososoli ete Makomi elobi ete, kati na elanga ya masángo, bakokanga liboso matiti mabe mabokeye-mabokeye. Pe basili kokangama mabokeye-mabokeye, bazali komibenga na ba-kombo ya kotúka oyo elongobani mpenza na bango te, elongobani pe na Lingomba te; ezali nde bifandelo, kasi mangomba te. Ezali bobele moko kati na yango, Tata, ezali Oyo Yo okufelaki.

²⁵⁰ Pe nabondeli, Tata, wana tozali komona bango nyonso kokangama mabokeye-mabokeye sikawa mpo na móto ya súfúlú kala mingi te, nabondeli, Nkolo, ete Ótika masángo kokomela pe kokóma na bozito. Kokisa yango, Nkolo. Tika ete tókóla pe tóngengisa Pole, pe tókóma lokola Yesu: “Soki Nazali kosala makambo oyo Nzambe asengaki Ngai kosala te, na boye Nazali na Bomoi kati na Ngai te. Kasi soki Nzambe azali koloba pe kotalisa Bomoi na Ye, na boye Yango ezali koloba mpo na Yango moko.” Kokisa yango, Nkolo. Natiki Nsango oyo na maboko na Yo, ete Ósenzela likolo na Yango, pe Ómema bato nkóto zomi na nkóto zomi, Nkolo, to, bana na Yo nyonso babongisámá liboso, na Nsango-malamu. Kati na Yesu Klisto, Oyo azali Liloba, nabondeli na Nkombo na Ye. Amen.

Nalingi Ye, nalingi Ye
Mpo Alingaki ngai liboso
Pe Asombi lobiko na ngai
Likolo na Ekulusu.

²⁵¹ Nalingi kotuna motuna. Bato boni na mpokwa oyo, kati na losambo oyo ezali komonana awa, na losambo kitoko ya bato mingi, to, ndako ya bato, nde, esika ya kokumbamela oyo, bandimi na motema mobimba, ete bomoi na bino ezali kokokana na bosenga (bino) ya Nzambe pe ya Biblia, pe bondimi ete, soki botali bomoi na bino moko, pe bomoni ndenge Molimo ezali kosala kati na bino, ete ezali kondima Liloba nyonso ndenge Ekomami, pe ezali kotósa Yango? Bondimi Yango? Nzambe ápambola bino. Tika ete Ábatela mpenza Molimo na Ye likolo na bino.

²⁵² Pe mpo na baninga na ngai baoyo bakoyoka bande, nalingaki kosepela ete bókoká komóná eyanganelo oyo awa na mpokwa oyo, nabanzi ete bato koleka ntuku libwa likolo na mokama batombolaki maboko, ete bandimaka pe batáelaka Biblia, (makambo lingomba elobi te) makambo oyo Biblia elobi,

(makambo efandelo elobi te) makambo oyo Biblia elobi, pe bamonaka Bomoi ya Klisto kotalisama kati na Yango.

²⁵³ Boyebi, na ntango ya kala, liboso ya kozala na ba-four ya konángola bibende, mo—monángoli wólo azalaki kobeta wólo na ndjondó. Nabanzi bosila koyóká likambo yango. Liboso ya kokóma na ba-four ya konángola, bazalaki kobéta yango. Pe wólo ezali eloko ya bozito koleka, ezali na bozito koleka mondu. Na bongo, nasálá pe mosala ya koluka mabángá ya ntalo mwa moke, okoki kotia zelo na esukoleli na biliki, pe oníkí maboko na zelo, na sima, (wuush) kofúlá ndenge wana, pe putulú ná biloko nyonso ekopumbwa, mabanga, kasi wólo ezalaka mpenza na bozito pe ekotikala wana. Na sima, ntango okozua wólo yango, ezalaka kati na bosoto mingi mpenza mpo esanganaka mingi. Na bileko ya ba-volcan, ndenge ezalaki kosangana mingi, ezalaka na potopóto pe nyonso wana, bibendé ná biloko mosusu esanganaka na yango. Mobéti azalaki kozua eteni ya wólo yango, kobeta yango pe kobalola yango, kobeta yango pe kobalola yango, kino akolongola mbindo na yango nyonso. Boyebi ndenge nini azalaki koyeba ete asili kolongola mbindo na yango nyonso? Azalaki komona elilingi na ye moko kotalisama kati na yango.

²⁵⁴ Ezali bongo nde Nzambe asalaka mpo na Lingomba. Abétaka bindimeli nyonso, bibongiseli nyonso, biyambweli nyonso ya bato, kino Akomona Bomoi na Ye moko kotalisama kati na bino. “Soki Nazali kosala misala ya Tata na Ngai te, bóndima Ngai te.” Bomoni? Soki eloko oyo esengelaki na Lingomba, Bomoi oyo ezalaki kati na Klisto, ezali komonana kati na bino te, bófanda kimia te soki bozangi motema molai, nguya, makambo nyonso oyo, komipekisa, ná—ná nyonso wana, bonzambe, boboto na bandeko, ná makambo nyonso oyo esengeli na bino. Ata bosáláki nini, ata bogángáki ndenge nini, ata bokótá na mangomba boni, ata bomikótísá nsala boni na nzoto, bósala yango te. Bózela kino na bosóló mpenza, na nse ya motema na bino, bókóka kolimbisa, kino na nse ya motema na bino, bózala na bobóto na bandeko. Ata babendi yo mandefu na ngámbo moko, ókoka kopesa ngámbo mosusu na bopolo, bomoni, kino ba-nguya yango, ata balobeli yo likambo nini.

²⁵⁵ Ntango bakangaki Ye elamba na elongi pe babetaki Ye na motó, balobaki: “Sikawa, bayebisi ngai ete Ozali Mosakoli.” Sikawa, balongolaki Ye elamba yango, pe moko na bango asimbacki fimbo, alobaki: “Nani kati na biso abetaki Yo? Sakólá pe yebisa biso, na elobeli mosusu, na boye tokondima ete Ozali Mosakoli.” Afungolaki monoko na Ye ata moke te.

²⁵⁶ Ntango bokoyoka ete mosakoli moko abimi, oyo azali na biyano nyonso na bisálélá nyonso bokoki kosala, bóyeba ete, azali mosakoli te. Lelo basengeli koyeba makambo nyonso, ntango míno ekosala yo mpasi pe ntango libumu ekosala yo mpasi, pe nyonso wana, pe bakoyebisa yo nyonso wana. Oyo

wana ezali lolenge ya Nzambe na biso te. Bótala basakoli, bótala Yesu.

²⁵⁷ Bótala Polo, ntango azalaki na makoki ya koboma moto miso, pe atikaki motuli-na-motako kobengana ye na etúka: “Nabanzi ete azali lisusu na nguya ya koboma moto miso te.”

²⁵⁸ Yesu, Oyo akokaki kosekwisa bakufi, kasi ata bongo, elobami ete sodá molangwi masanga abwakelaki Ye nsoi na elongi, abendaki nsoi na mongongo, pe abwakaki, abendaki Ye mandefu, pe abetaki Ye na motó, ná elamba ya bosoto na elongi na Ye, balobaki: “Sakólá pe yebisa biso nani abetaki Yo.” Kasi Afungolaki monoko te.

²⁵⁹ Bótalaka basali ya bisálá-sala nyonso wana te. Kasi bóbosana te, bazali se kotalisa likambo, dollar ya lokuta elakisaka se kolakisa ete oyo ya solo ezali esika moko. Ntango bomoni makambo ya bibongiseli kokóla pe kofúluka, ndenge elobamaki ete “misala ekofúluka na loboko na ye,” bóbosana te, ezali na lingomba moke ya Nzambe esika moko, oyo etondisami mpenza na Molimo Mosantu, ya solosolo, oyo ezali komata na ebuteli. Bótalaka bibongiseli minene te.

²⁶⁰ Lingomba monene nini balobeli na Biblia koleka eleko ya lingomba ya Efese? Pe ntango Polo alekaki na ba-nzela ya ngomba na mokili ya Efese, pe akómaki na lingomba yango, ezalaki na bato zomi na mibale na kati. Ezali solo. Pe bango nyonso bazalaki bato malamú, bazalaki koganga pe kolekisa ntango kitoko, kasi bayambaki naino Molimo Mosantu te. Polo alobaki: “Bozuaki naino Molimo Mosantu te uta bondimáki?”

Balobaki: “Ee, toyebaki te ete Molimo Mosantu ezalaka.”

²⁶¹ Alobaki: “Boye, bobátisamaki ndenge nini?” Soki ezalaki na bokesene te, mpo na nini alobaki yango na lingomba wana?

²⁶² Balobaki: “Tosílá kobatisama na moko na bato minene koleka oyo basílá kozala na mokili, Yoane Mobatisi, ye oyo abatisaki Nkolo na biso. Libatisi yango ekokaki te?”

²⁶³ Alobaki: “Te, misie. Bosengeli kobatisama lisusu, mpo Bokonzi ekangami na elembo na eloko mosusu nyonso.” Pe ntango bayokaki bongo... Alobaki: “Yoane abatisaki bobele mpo na kobongola motema, kasi mpo na bolimbisi ya masumu te, alobaki ete bosengeli kondimela Ye oyo akoya, ezali nde, Yesu.” Pe ntango bayokaki bongo, babatisamaki lisusu na Nkombo na Yesu Klisto. Ezali solo. Yango mpenza. Balandaki Makomi.

²⁶⁴ Boyebi, na kobulisama ya ntongo oyo, Mose alandaki ndakisa oyo amonaki na Likolo, pe atelemisaki héma mpo na kotalisa yango. Ntango Salomona atongaki tempelo, ye (asalaki nini?) alandaki ndakisa oyo Mose, na nzela ya héma, abatelaki Makomi na molongo.

²⁶⁵ Pe ntango Nzambe ayaki na Tempelo na Ye mpo na ntango ya suka, Tempelo oyo, Molimo Mosantu, “Osili kobongisela

Ngai nzoto,” Molimo Mosantu ekitaki Mokolo ya Pantekote, nsango ezalaki: “Bóbongola mitema, moko na moko na bino, pe bóbatisama na Nkombo na Yesu Klisto mpo na bolimbisi ya masumu, pe bokozua likabo ya Molimo Mosantu. Mpo elaka yango ezali mpo na bino pe mpo na bana na bino, pe mpo na baoyo bazali mosika, baoyo nyonso Nkolo Nzambe na biso akobenga.” Soki bolingi kobenga motei na bino molakisi, Molakisi Simon Petelo akomaki ekomeli-nkisi, ekomeli-nkisi ya Seko. Yango nde ebikisaka babéli.

²⁶⁶ Tika ba-pharmacien ya lokuta oyo balukaka, na nzela ya bibongiseli, kosalela yango ndenge mosusu, yango wana bazali na . . . Boyebi, soki obakisi te . . . obakisi mingi koleka ekomeli-nkisi, okoki . . . mbondo mingi koleka, okoki koboma mobéli na yo. Soki otii pe oyo ekoki te, yo . . . lokola antidote, soki otii oyo ekoki te, ekosunga mobéli na yo te. Monganga na yo ayebi mpenza lolenge bakomaka ekomeli-nkisi.

²⁶⁷ Pe Klisto, Molimo Mosantu, azali Mokomi Nkisi, pe Ye moto akomaki Yango. Kobakisa na Yango te to kolongola na Yango te, melá bobele Nkisi yango ndenge ezali. Yango nde Nkisi ya mpasi nyonso. Nzambe ápambola bino. Bolingi Ye? Amen.

Nalingi Ye, na . . . [Maloba mazangi na bande—
N.D.E.]

Mpo Alingaki ngai liboso
Pe Asombi lobiko na ngai
Likolo na Ekulusu.

²⁶⁸ Sikawa, wana tozali koyemba yango na nse ya mongongo, sikawa baluka pe pesa mbote ya loboko na mozalani na yo kuna. Oh, ye pe azali moleki-nzela, azali koleka.

Nalingi Ye, nalingi Ye (Ezali kitoko mingi.)
Mpo Alingaki ngai liboso
Pe Asom--biko.

(Yaka na nzela oyo. Iyo, matondi, ndeko.)

Nalingi Ye, nalingi Ye
Mpo Alingaki ngai liboso
Pe Asombi lobiko na ngai
Likolo na Ekulusu.

Nalingi Ye, (toyemba yango sikawa), nalingi Ye
Mpo Alingaki ngai liboso
Pe Asombi lobiko na ngai
Likolo na Ekulusu.

²⁶⁹ Sikawa tógumba mitó, tókanga miso, tótombola maboko pe mingongo epai na Nzambe sikawa, wana natiki bino na maboko ya mokengeli. Tosepeli kozala na bino awa. Tozali ebongiseli te. Tozali na mobeko mosusu te bobele bolingo, endimeli mosusu te bobele Klisto, buku mosusu te bobele Biblia. Tozali na kalati-ya-

lingomba te; bobele bondeko na nzela ya Makila na Yesu Klisto oyo epetolaka biso na kozanga kondima nyonso.

²⁷⁰ Malamu, biso nyonso elongo sikawa.

Na . . .

Na . . .

Nzambe ápambola bino. Bóya lisusu kotala biso.

Mpo Alingaki liboso . . .

Malamu, mokengeli, Osili kobéléma? Nzambe ápambola yo.

Pe . . .



MPO NA NINI NATELEMELAKA LOSAMBO YA EBONGISELI LIN62-1111E
(Why I'm Against Organized Religion)

Liteya oyo ya Ndeko William Marrion Branham, eteyamaki liboso na Ngelesa na lomingo na mpokwa, mokolo mwa 11, sanza ya zomi na moko, na mobu 1962, na Branham Tabernacle, na Jeffersonville, Indiana, U.S.A., ekamatamaki uta na bande pe ekomamaki mobimba na yango na Ngelesa. Ndimbola oyo ya Lingala ekomami pe ekabolami na Voice Of God Recordings.

LINGALA

©2017 VGR, ALL RIGHTS RESERVED

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Liyebisi ya makoki ya mokolo-eloko

Makoki nyonso ekopesama na ndingisa. Búku oyo, ekoki kozala imprimé na masíni ya ndako mpo na yo moko to kokabama, ofelé, lokola esalelo mpo na kopalanganisa Nsango Malamu ya Yesu Klisto. Búku oyo ekoki kotekama te, koyíkanisama te, kotiamana na site internet te, kobombama mpo na kolukaluka te, kolimbolama na nkota mosusu te, to kosalela yango mpo na kosenga misolo te, kozanga ndingisa ekomami mpenza na Voice Of God Recordings®.

Soki olingi koyeba makambo mosusu to kozua bisalelo mosusu, komélá:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org